



Vol. 88  
—  
no. 194

Q. 27

C. 8





GVILIELMI FABRICII

*authores*

HILDANI CHIRURGI

*de acc. cat.*

DE

*de igne in exper.  
de p. p. n. s. s.*

COMBUSTIONIBUS,

QUAE OLEO ET AQUA

fervidâ, ferro candente, pulvere tormen-

tario, fulmine, & quavis alia

materia ignita fiunt

*concordia  
de p. n. s. s.*

LIBELLUS:

IN QUO DIFFERENTIAE,

SIGNA, PROGNOSTICA, ET

Curatio, tum ipsarum combustionum tum

omnium ferè Accidentium

perspicuè descri-  
buntur.

*al. indic.*

*1632*

*de del. max. n. s. s.  
p. v. c. n. s. s.  
de p. n. s. s.  
in off. u. l. a.*


~~Handwritten notes and scribbles, mostly illegible.~~



BASILEÆ,

Sumptibus LVDOVICI REGIS.

MDCVII.



*Handwritten signature or name at the bottom right, possibly 'F. S. C. S. S.' or similar.*

GENEROSO, VIRTUTE ET  
DOCTRINA VERE NOBILISSIMO,  
PRUDENTIA SUMMAQUE HUMANA-  
NITATE PRAESTANTISSI-  
MO VIRO

DOMINO

SEBASTIANO AB HATZ-  
FELT, DOMINO IN  
WILDENBERG CRO-  
TORFF. &C.

LITERATORUM PATRO-  
NO MAXIMO

DOMINO SUO BENI-  
GNISSIMO

DE COMBUSTIONIBUS  
TRACTATUM

Grati animi & perpetuæ obser-  
vantiaë monumentum


GUIL. FABRICIUS HIL-  
DANUS

offert, consecratq;

EPISTO.



EPISTOLA DEDI-  
CATORIA.

 *Vemadmodum ex minima scin-  
tilla GENEROSE DOMINE,  
sapissimè ingentem flammam &  
incendium maximum, quod pagos & op-  
pida integra consumit, excitari videmus:  
Sic non rarò ex affectu levissimo, qui &  
prima fronte nullius momenti videbatur,  
morbum diuturnum, imò etiam incurabi-  
lem, & lethalem procedere, usu atque ex-  
perientiâ indies edocemur.*

*Quid enim quaso Acaro levius ac vi-  
lius corpori humano accidere posset? At-  
tamen ex eo alterum interysse, alterum  
verò quasi ex Cymba Charontis creptum  
fuisse, in meis Observationibus annotavi.  
Hujus autem rei causa, aut ex parte aegri,  
aut ex parte Chirurghi, accidit. Ex parte  
Aegri; quando corpus pravis humoribus,  
aut sanguine, vel quantitate vel qualitate  
peccante, refertum est, neque ager consilio*

## E P I S T O L A

*Medici obtemperare, neque illam, quam deberet, victus rationem observare velit. Tunc enim ex minimo quolibet affectu externo commoti humores ad partem affectam, cum impetu confluunt, ac primò quidem dolorem ac inflammationem, mox febrim, atq; graviora symptomata excitant. Unde non immeruò morbi hi, à vitiosis ac pravis humoribus orti, à Gal. Method. med. lib 4. & alibi, inter morbos magnos numerantur.*

*Ex parte verò Chirurghi, sunt ex affectibus levissimis morbi magni, aut etiam lethales, quando is exactam artis cognitionem non habuerit, aut in curando negligens fuerit. Cùm enim O C C A S I O P R A E C E P S, ut rectè monuit Hippocrates, ac materia, circa quam versatur Ars, ut Galenus docet, continuò fluat, corpusq; nostrum mutationibus obnoxium, & tum à causis intrinsicis, tum extrinsecis facilimè alteretur, temporis habenda est ratio, ne Occasio hac aut illa circa egrum facienda, pratereat. Summa igitur in Chirurgo diligentia, vigilantia & sobrietas requiritur. Praterèa ad exactam*

*artis*



## DEDICATORIA.

artis cognitionem, simplicem aliquam habere notitiam, aut externorum affectuum curandorum experientiam, videlicet vulnera curare, luxata aut confracta ossa reponere, aut calculum extrahere, Chirurgo haud sufficiet, sed ut alterum oculum ad interna viscera, alterum verò ad externum affectum, fixum insuper habeat, necesse est. Nisi enim recta agro praescripta fuerit victus ratio, corpusq; à pravis humoribus, si Cacochymia, aut sanguine, si Plethorâ adsit, expurgatum fuerit, ex minimo quolibet affectu externo, morbus magnus aut lethalis expectandus erit: humores enim ex corpore doloris vi, ad locum affectum impetu confluunt attrahunturq; Galeno attestante. Hanc autem cognitionem non ex simplicissima aliqua experientia, multò minùs ex traduce de patre in filios, ut pleriq; gloriantur, sed ex Hippocratis, Galeni, aliorumq; probatissimorum Medicorum atque Chirurgorum monumentis haurire licet. In primis verò in admiranda illa & divina structura humani corporis, ut notitiam non superficialiam habeat Chirurgus, necesse est. Sed proh do-

## EPISTOLA

lor, quamplurimi hodie exercent hanc artem tam nobilissimam, tamq̄ à vetustissimis Imperatoribus & Regibus celebratam, aliarumq̄ omnium artium dignissimam habitam, qui vix quisnam Hippocrates aut Galenus fuerit, sciant, imò nec vernaculam suam linguam legere noscāt.

At quia Ignorantia homines impudentes & audaces efficit, qui quamvis in morbis curandis methodum nullam observent, liberrima tamen & impudentissimā audaciā multa promittunt, multaq̄ de morborū constitutionibus blaterant, Quādoquidem

Inipienti inest major jactantia menti,  
Vas etenim pleno tinnit inane magis.

Nunc hepar & pulmones consumptos putrefactosq̄ esse. Sed illos in integrum posse restituere, se jactant, Nunc calculum, marmoris instar, licet induratum, absq̄ periculo posse conterere, & expellere, multaq̄ alia vana & impossibilia promittunt. Sed ut & aliquid agere videantur, hic colocynthide, ille antimonio vel simili medicamento acri humores educit, decoctum ligni guajaci exhibet, aut membra levissima aliqua

## DEDICATORIA.

*aliqua scabie aut dolore affecta, hydrargi-  
 ro inungit, à quibus medicamentis sic im-  
 prudenter, & cura iudicium exhibitis &  
 applicatis, sapissimè agrotò plus accedit pe-  
 riculi, quàm à morbo ipso. Interim, (quod  
 caput rei est) pecuniam simul emungunt.  
 Hinc apud illos augetur divitiæ, augeturq;  
~~apud illos augetur divitiæ, augeturq;~~  
~~apud illos augetur divitiæ, augeturq;~~  
~~apud illos augetur divitiæ, augeturq;~~  
 Medici ac Chirurghi, qui juventutem mul-  
 tis vigilijs multisq; laboribus ad Artem ex  
 veris fundamentis addiscendam, consum-  
 pserant, contriveruntq; non solum à ple-  
 beis frequenter, verum etiam à magnati-  
 bus sæpè negligantur. Tàm depravatam est  
 ætatis hujus exulceratissimum sæculum.  
 Mirum itaq; non est, si sapissimè ex mini-  
 mis quoq; & levissimis externis affectibus,  
 gravissimi, imò & lethales oriantur mor-  
 bi, si item curationes sinistrè succedant, si  
 deniq; tot homines ab hujusmodi imperi-  
 torum barbitonsorum, seplasiariorum, Ju-  
 deorum ac carnificum fœnore truciden-  
 tur, aut ad minimum ad summam mise-  
 riam, & membrorum suorum impoten-  
 tiam, redigantur. Hanc porrò imperitiã*

## E P I S T O L A

*Et ignorantiam artis, per sepe barbitonso-  
 res, aliosq; Chirurgiam exercentes à natu-  
 rali, Et à Deo constituta via, morbos cu-  
 randi per remedia licita, abstraxisse, atq;  
 ad illicita, diabolica Et superstitiosa media  
 rapuisse, observavi, quorum nonnullos co-  
 gnovi, qui ad hominum morbos curandos,  
 conjurationibus, ~~et aliis~~*

~~et aliis~~ *ue-  
 bantur: Alios, qui ad vulnera curanda,  
 non vulnus ipsum curabant, sed lapidem,  
 culirum, gladium, aut baculum, qui vul-  
 nus inflexerat, deligabant atq; fasciabant.  
 Quam curationem dicant illi, quicquid  
 velint, illicitam tamen, magicam, Et planè  
 diabolicam esse, quinctiam tum in sacris,  
 tum Patrum scriptis vetitam, testantur  
 viri graves. Meritò itaq; in Republica  
 Christiana benè cōstituta, hujusmodi præ-  
 stigiis Et magici Curatores, tolerandi non  
 sunt. Quam ob causam sanitas à Deo,  
 tum precibus supplicibus, tum adhibitis à  
 Deo creatis naturalibus remedijs, petenda  
 est, nec unquam malum faciendum, quem-  
 admodum monet Divus Apostolus Paulus  
 Rom. 3. cap. vers. 8. ut inde bona eveniant.*

*Quicunq;*

## D E D I C A T O R I A .

Quicumq<sub>3</sub> verò ad morborum Curationes, aut præservationes caracteribus, ~~et aliis~~  
~~superstitionibus~~ aliisq<sub>3</sub> supersti-  
 tiosis conjurationibus utuntur, verbo Dei  
 abutuntur, & contra secundum præceptum  
 gravissimè peccant.

Porrò Combustiones etiamsi non sper-  
 nendæ, res tamen eò devenit, ut vulgò susq<sub>3</sub>  
 deq<sub>3</sub> habeantur, adeoq<sub>3</sub> quilibet sutor, tex-  
 tor, circumforaneus, & similes stupidissimi  
 asini, illas curare nunc aggrediantur. Quæ  
 verò inde sequantur mala, quamq<sub>3</sub> jactu-  
 ram sanitatis plurimi, qui superficialia  
 combustiones herpetes exedentes, & ulcera  
 incurabilia, contrahunt, faciunt, verbis  
 hîc exponere supervacaneum videtur,  
 cùm res ipsa loquatur.

Ceterùm quamvis à multis ab hinc an-  
 nis methodum facilimam & tutissimam  
 Combustiones curandi invenissem, lubensq<sub>3</sub>  
 in Chirurgicam artem exercentium uti-  
 litatem & agrorum salutem, typis man-  
 dassem, diu tamen suppressi, & animo su-  
 spensus fui, quid agerem, ut rectè agerem.  
 Quandoquidem tam varia tamq<sub>3</sub> diversa

## E P I S T O L A

hoc tempore sunt hominum iudicia, ut quæ  
 unum capiunt, alteri nauseam provocent. Ve-  
 rum postpositis ~~hæc, & hæc, & hæc~~  
 tionibus, quæ me ab instituto merito de-  
 terrere potuissent, Christianâ tamen cha-  
 ritate commotus, quicquid occupationibus  
 meis temporis suffurari licet, id libenter in  
 tyronum & ægrorum utilitatem impendo.  
 Faxit Deus Opt. Max. ut uberrimus inde  
 fructus ad Asclepiadeam familiam redun-  
 dare possit.

Hunc verò quantulumcumq; laborem  
 meum sub celeberrimi nominis tui patro-  
 cinio & auspicio, G E N E R O S E D O M I-  
 N E, idè in lucem dare statui. Primò, quòd  
 inter viros literatos, doctrinæ præstantiâ,  
 & ingenii acumine, non infimum tibi oc-  
 cupaveris locum, & etiamnum continuò  
 bonis literis incumbas, ita ut de tractatio-  
 ne materiæ hujus non solum censuram fer-  
 re, verum etiam illam, contra maledicen-  
 tium morsus, si opus sit, vindicare potens  
 sis. Deinde propter singularem amorem  
 atq; humanitatem, quâ totum illud tem-  
 poris spaciū, quod Colonia trivi, me am-  
 plecti

## DEDICATORIA.

pleſti non ſolùm dignatus es, verùm etiam  
 præ aliis quàm plurimis viris doctis & e-  
 ruditis, in graviffimis quoq; affectibus, ad-  
 hibere, valetudinemq; corporis tui tuorūq;  
 mihi committere volueris. At quum nunc  
 privatim locus gratias referendi, non con-  
 cedatur, publico hoc testimonio perpetuam  
 animi mei gratitudinem atq; obſervantiam,  
 cogitatio tua, & ſuaſoria, & ſeſſiorū,  
 totūq;

~~[The following text is heavily obscured by dark ink blotches and is illegible.]~~

Munuſculum itaque hoc Chartaceum  
 GENEROSE DOMINE obſervantia  
 mea perpetuum monumentum pro ſolita  
 tua in me humanitate ac benevolentia,  
 benignè ut ſuſcipias, ſummoperè rogo atq;  
 flagito. Vale GENEROSE & humaniſ-  
 ſime Domine cum Nobiliſſima tua conju-  
 ge, & ſobole generoſiſſima, totaq; familiâ

EPIST. DEDICATORIA.

HATZFELDIORUM, quam, ut DEUS  
OPT. MAX. diutissimè incolumem con-  
servare, ac omnibus spiritalibus ac tempo-  
ralibus bonis ditare dignetur, demissè  
precor. Ex Musæolo nostro Machao-  
nico 20. Januarij.

1607.







GUILIELMI FABRICII  
HILDANI CHIRVRGI


DE

*Combustionibus, quæ oleo & aquâ fer-  
vidâ, ferro candenti, pulvere tormenta-  
rio, fulmine & quavis alia mate-  
riâ ignitâ, fiunt,*

*Libellus:*

In quo

Differentiæ, Signa, Prognostica, & Cu-  
ratio, tum ipsarum combustionum,  
tum omnium ferè eorum Acci-  
dentium, perspicuè de-  
scribuntur.



*Definitio, & causa Combustionum.*

CAP. I.



**Q**UONIAM Combustio sit affectus  
omnibus notissimus, at tamen cla-  
rioris doctrinæ gratiâ, antequàm  
ulteriùs progrediamur, eum sic de-  
scribemus.

Combustio est solutio continui Epidermi- *Definitio*  
dis, & Cutis ut plurimum, nonnunquàm et. *cõbustionis.*

A

iam carnis musculosæ, Venarum, Arteriarum, Nervorum, &c. vi ignis impressa. Hanc autem combustionem sequuntur mox dolor acerbissimus, inflammatio, pustulæ: & si combustio profunda, corpusq; cacochymicum fuerit, facillimè degeneratur in ulcus fœtidissimum & malignū, quamprimū enim ignis, aut res ignita cutem attigerit, ratione caliditatis & siccitatis ignis, humidum radicale, ex parte illicò exiccatur: hinc cutis indurescit, & contrahitur: quod reliquum est humoris in cute, & proximis partibus, supra modum incalescit, & acquirit naturam ignis.

Porro durities illa cutis (quia circumjacentes partes contrahit) item ebullitio humorum, & solutio continuitatis, protinūs acerbissimum excitant dolorem, ille verò ex proximis partibus ad se attrahit multos humores, qui (si combustio levis fuerit.) sub Epidermide concurrunt, eamq; quia vi ignis induruit, nec transpirationem admittit, in altum elevant, hinc fiunt pustulæ. Si autem combustio insignis fuerit, ita ut vera cutis simullæsa, in escharam indurata fuerit, tunc humores innati, & quicquid continuò ratione doloris adfluit, retinentur, & incarcerantur sub cute illa indurata, inde non solūm augetur eorum caliditas, quam ab igni acceperunt, verūm etiam quicquid sanguinis & humorum ex corpore, & proximis partibus adfluit, simul incalescit, effervescit, & acrimoniam quandam acquirit, hinc fit, ut humores  
illi

illi locum affectum erodāt, & ulcus magnum efficiant.

Cæterum notandum est, quemadmodum multiplices & diversæ occurrunt materiæ, quibus ignis vim & Qualitatem suam imprimit, quæ, ut substantiâ differūt, sic etiam una multò vehementiùs urit, quàm altera. Itaque quantò durius & solidius existit lignum, aut metallum aliquod, tantò vehementiorem in se quoque retinet calorem. Calor item olei, pinguedinis, ceræ, picis, sapæ ad consistentiam coctæ, uti postea declarabimus exemplo, & eorum, quæ facilè adhærent, multò est vehementior, calore aquæ fervidæ, quandoquidem experientia docuit, plumbum & stagnum in oleo fervido liquefieri, id quod nunquam fiet in aqua, quantūvis in summo gradu caliditatis fuerit. Quando calx extinguitur, tunc adeò incalescit, ut non solùm cutem & carnem urat & exulceret, verùm etiam cutem, nervos & iuncturas violenter contrahat. Ignis verò omnium vehementissimus & periculosissimus, est ignis cælestis, sive fulminis; continet nanque in se quasdam facultates supernaturales, quemadmodum suo loco exponemus.

*Gradus & distributio combustionum  
in tres species, item ex quibus Indi-  
cationes curative  
petenda.*

CAPUT I I.

**Q**uamvis autem combustio à diversis fiat materijs, metallis & liquoribus, quemadmodum diximus, nihil tamè, vel parùm id facit ad curationem. Quandoquidem combustio ferro candenti facta, similis est combustioni Auro aut argèto candenti factæ. Sic & combustiones sive oleo fervido, cerâ, pice, &c. factæ fuerint, inter se (quantum ad materiam) non differunt, neque particularem requirunt curandi methodum. Quemadmodum clariss. D. D. Laurentius Joubertus vir eximius & de Chirurgia benè meritis, testatur. Nulla igitur sumenda est indicatio curativa ex materia ignita, sed potiùs ab effectu quem impressit. Ut autem curatio rectè instituat, distribuemus combustiones omnes, à quacunq; fuerint factæ, materiâ ignitâ, in tres gradus seu species, nempe in levissimâ, mediocrem & insignem. Si enim materia, quæ urit non usq; adeò diu adhæserit corpori nostro, aut levis fuerit, quemadmodum stramè, linum, stupæ, aut lignum aliquod leve, vel aqua, quæ citò defluit, tunc tantummodò elevantur pustulæ, est que hic primus gradus seu species.

*Prima Indica-  
tio ex qui-  
bus sumenda.*

species. Si verò materia paulò diutiùs adhæserit, aut violentiore calore prædita fuerit, tunc non solùm elevantur pustulæ, verùm etiam cutis vera suo humido radicali ex parte destituitur, & aliquo modo exiccatur & contrahitur, nondum tamen facta est eschara. Tertio si res ignita diutissimè adhæserit, & violentissimum calorem in se continuerit, tunc non solùm cutis, verùm etiam caro, venæ, arteriæ, nervi, &c. comburuntur, contrahuntur, & in Escharam siccantur: quandoquidem humidum innatum vi ignis exiccatum & consumptum est. Sunt itaq; medicamenta mutanda & applicanda secundùm has differentias, quemadmodù postea declarabimus. Secunda *2. Indicatio.* Indicatio sumitur à parte affecta: non enim unum idemq; medicamentum simul convenit oculo, membro virili, nervo, iuncturis, carni musculosæ, &c. Mulieres item, pueri & qui exquisito sensu præditi sunt, debiliora requirunt medicamenta; contrà verò fortiora, qui duram habet carnem, & robustiores sunt homines, ut Galenus rectè admonuit: Ex hac descriptione & distributione combustionum *De arte curat. ad Glaz con. lib. 2. cap. 9.* facile apparet curandi methodus, quam nos postea tribus capitibus, prout combustiones in tres species distribuimus,

Deo dante declarabimus.

*Signa, quibus tres illi gradus combustionum cognoscendi & distinguendi.*

CAPIT. III.

**Q** Via combustiones in tres divisimus species vel gradus, ac deinceps ad uniuscujusq; speciem propria præscripturi sumus remedia, necesse est, ut quomodo eæ signis & notis distinguendæ sint, declaremus. Signa itaque primæ speciei, sive levissimæ combustionis hæc sunt: cutis rubicunda, dolor acerbissimus & pungitivus, non aliter, ac si cutis semine urticæ fricata esset. Mox, (nisi citissimè occurratur ægro remedijs aptis) inflatur locus, & elewantur pustulæ, in quibus aqua clara & alba continetur, tandem quoq; Epidermis separatur. Ex circumstantijs quoque cognoscitur combustio levis, nimirum rem ignitam levem fuisse, quemadmodum stramen, linum, stupæ, & similia: aut statim defluxisse, ut aqua fervida, vel corpus exiguo momento attigisse. Contrà verò in altera specie, res ignita aliquandiu corpus attingit, vel vehementiorem in se habuit calorem, quemadmodum ferrum ignitum, aut metallum aliquod liquefactum, lignū durissimum, pix, oleum, cera, vel simile quid. Hinc fit, ut pars illicò inflatur, rubescat, doleat, urat, & ipso momento pustulæ eleventur, in quibus conti-

*Signa primæ speciei combustionis.*

*Signa secundæ speciei.*

continetur aqua subtilis, & flavescens, ægerq; de tensione cutis conqueritur: est enim vi ignis contracta atque tensa. In ultima verò specie, ipso quoque momento, dum res ignita adhæret corpori, elevantur pustulæ, sed illicò *Signa tertia speciei.* denuò concidunt, eo præcipuè loco, in quo combustio insignis & vehemens est: subjecta verò cutis nigra, vel saltem livida conspicitur, & obtusè sentit, si scalpello pungatur; est enim dura, & exiccata crusta, ea cum deciderit, remanet ulcus profundum, & putridum. Ex natura rei ignitæ, & spacio, quo corpori adhæsit, combustio insignis cognosci licet.

Porro quamprimum Chirurgo occurrit combustio, inquiret ad quamnam speciem sit referenda, hoc est, an levis, mediocris, vel insignis fuerit; si levis, impediatur remedijs, sequenti 6. cap. declarandis, ne pustulæ eleventur: si verò mediocris, ad septimum caput cõfugiat: Si enormis & magna, procedat, quemadmodum capite octavo declarabimus.

---



---



---

*Prognostica Combustionum.*

CAPUT IV.

**C**ombustio levis, ubi cutis tantummodo læsa est, quantumvis dolorifica, facile tamen & brevi curatur, & vix apparebit cicatrix, si modò recta & methodica instituta fuerit curatio. Contrà verò difficile sanatur combustio insignis & magna, quæ

turpem & rugosam post se relinquit cicatricem, propter cutis deperditionem & contractionem. Si pustulæ in principio non aperiuntur, tunc multi humores concurrunt ad partem læsam, qui putrescunt, & acrimoniam acquirunt, ita ut cutem & carnem profundius erodant, ulcus putridum, & tandem cicatricem turpissimam efficiant. Sunt itaque pustulæ statim ab initio incidendæ, ut aqua acris & fervida effluere queat.

*Pustule cur  
à principio  
aperiendæ.*

Facile & parvo negotio sanescit combustio in corporibus sanis, & benè temperatis. Contrà difficillimè in corporibus cacochymicis & plethoricis, facileq; degenerat in ulcus putridum; dolor enim continuo ad se attrahit ex corpore humores & sanguinem, hinc pars affecta incalescit, & inflatur, variaq; & pessima symptomata sequuntur.

*Combustio-  
nes capitis  
& faciei.*

Combustiones capitis & faciei, si magnæ & profundæ fuerint, glabras post se relinquunt cicatrices, quandoquidem cutis adeò arefacta & contracta est ab igne, pori que clausi, ut pili postea erumpere nequeant.

*Combustio-  
nes membra-  
narum ocu-  
li.*

Combustio ad oculos præcipuè ciliarum & membranarum Adnatæ & Corneæ, quantumvis levissima sit, periculosa est, & facilimè visus depravatio, aut ad minimum imbecillitas sequitur, & palpebræ invertuntur.

*Combustio-  
nes ingui-  
num.*

Periculosæ item sunt combustiones Inguinum, & difficilimè curantur: sunt enim huiusmodi membra per se humida, imbecilla & affluxui humorum obnoxia.

Combu.



Combustio Ventris semper periculosa est, *Combustio ventris.*  
 difficilimeque curatur: sunt enim muscoli abdominis propter inspirationem, & expirationem, extensionem, quæ fit mediante cibo & potu, excrementorum excretionem, risum & clamores, in perpetuo motu, quemadmodum Hildenæ in patria in quodam puero trium annorum ætatis, observavi: Is enim combustione periculosa ventris affectus, ultra menses octo nobis multum negotii faceffit.

Si verò Intestina aliqua in parte simul combusta fuerint, lethale est. Est & Combustio Fulminis mortalis, uti suo loco dicitur. *Combustio intestinor.*

Combustio ad magna vasa Arteriarum & Venarum periculosa est, præcipuè si profunda fuerit: calor enim contrahit, & vasa claudit, hinc spiritus & sanguis ad vivificandum & nutriendum, non satis perfluere possunt: & tandem sequitur Atrophia, nonnunquam & Gangræna, quemadmodum in Tractatu nostro de Gangræna & Sphacelo ostēdimus. Combustiones item ad nervos & Articulos facilius contrahunt Junctionuras, ideoque ut Chirurgus in hujusmodi combustionibus summam diligentiam adhibeat, & statim ab initio medicamentis aptis durtiem & rugositatem cutis emollire, & calorem ab igne impressum, extrahere & dissipare studeat, necesse est. *Combustio ad magna vasa Arteriar. & Venar.*



*De duplici methodo combustionum  
curandarum.*

*CAPUT V.*

*Finis ad quæ  
Combustio-  
num reme-  
dia tendant.*

**Q**uanvis passim infinita ad Combustiones apud Practicos & plebejos in usu sint remedia, sive ea Emplastra, Vnguenta, Succii aut Aquæ distillatæ fuerint, nihilominus tamen omnia ad hunc finem tendunt, nimirum Empyreuma sive calorem ab igne in parte affecta relictum, aut suffocent, aut resolvant, & dissipent. Suffocatio autem Empyreumatis, fit aut frigidis & humidis medicamentis, veluti succis & aquis sempervivi, Lactucæ, Hyoscyami, Solatri, & similibus: aut frigidis & siccis, quemadmodum sunt bolus armenus, terra sigillata, cerusa, argilla fornacum, & hujusmodi Emplastica, quæ poros occludunt. Ita ut calor extraneus ab igne relictus, non aliter ac ignis in loco occluso, intus suffocetur & extinguatur.

Altera via extinguendi empyreuma in hoc consistit, ut calor extraneus, & humores acres resolvantur, & dissipentur, quemadmodum vidimus prunas extinguui, si huc illucq; dissipentur. Id verò fit calidis medicamentis, ut sequenti capite declarabimus. Nunc operæ pretium est, inquirere, quænam methodus sit eligenda.

Qui primam methodum sequuntur, hoc  
axio-

axiomate Hippocratis, Contraria contrario-  
rum sunt remedia; se fulciri putant. Cùm  
enim combustio sit accidens calidum, suo  
contrario, nempe frigidis empyreuma, & in-  
cendium ab igne relictum, extinguere conan-  
tur. Verissimum quidem esse recitatum Axio-  
ma Medicorum, fateor, sed refrigerationem  
in combustionibus per Accidēs fieri debere,  
sentio. Ex prima enim curandi methodo, cùm  
varia ut plurimū oriatur symptomata, quem-  
admodum postea declarabimus, meritò re-  
jicienda est. Non enim solùm Empyreumati  
occurrere sufficit, sed præcipuè alijs quam-  
plurimis accidentibus, ut sunt dolor, retra-  
ctio & rugositas cutis, stipatio pororum, &c.  
prospiciendum est, quæ omnia calida requi-  
runt medicamenta. Hæc autem, ut penitus  
intelligantur, videamus primò proprietates  
frigoris. Eas autem Hippocrates describit his  
verbis. Ulceribus frigidum mordax, cutem  
obdurat, dolorem intolerabilem facit, deni-  
grat, rigores febriles, convulsiones & disten-  
siones creat. Et Galenus: Subjectam materiã  
contrahere condensareque, frigidi semper est  
proprium. Id quoque perspicuum fit in oleo,  
pinguedine alijsq; rebus, quæ frigore densan-  
tur & indurescunt. Ex quibus perspicuum fit,  
frigida combustionibus planè aduersari, & va-  
ria pessimaque accidentia procreare: Cutis  
enim ab igni indurata & contracta, magis ab  
usu frigidorum medicamentorum indurescit,  
& dolor augetur, hinc concurrunt humores,

*Lib. de flari-  
bus. Gal.  
meth. med.  
lib. 11. & li.  
de optima  
corporis con-  
stitutione.*

*Lib. de liqui-  
dor. usu in  
fine, & lib.  
5. aphor. 20.  
De simplic.  
medic. fa-  
cult. lib. 4.  
cap. 1. & de  
usu part.  
lib. 16.*

qui sub cute indurata non solum retinentur, imò ab usu frigidorum Medicamentorum in profundum repelluntur, ibiq; magis magisq; incalescunt, & summam acrimoniam & malignitatem acquirunt. Hinc tandem fit Inflammatio, Abscessus, & nonnunquam Gangræna. Inclusus enim humor, quia perspiratione caret, illicò putrescit, ut Galenus testatur: vel quia calor adventitius, dum in parte læsa inclusus est, exiccavit humidum radicale, in quo consistit calor natus, quemadmodum in Tractatu de Gangræna ostendimus. Hanc quoque ob causam monuit Hippocrates Erysipelas ab exterioribus ad interiora verti, non esse bonum. Sequitur & nonnunquam si combustiones magnæ frigidis Medicamentis tractentur, Herpes exedens; humores enim sub cute inclusi acrimoniam & malignitatem acquirunt. Anno 1594. venit ad me Coloniam iuuenis, cui ex simplici Combustione Herpes totam tibiã à pede usque ad coxam invaserat, ita ut nonnulli tibiã abscidissent, si malum tantummodò sub genu fuisset. Hunc quã methodo, & quibus medicamentis curaverim, lector ex meis observationibus Chirurgicis intelligere poterit.

*Lib. de inc-  
quali in: em  
perie.*

*Lib. 6. apho-  
ris. 25.*

*Observatio-  
ne 99.*

Quum igitur animadverterem, quemadmodum prunas, si cineribus diligenter cooperiantur, calorem suum diu conservare, sic etiam Empyreuma, & humores, qui in combustionibus ad locum affectum confluunt, ab usu frigidorum medicamentorum intus retineri,

retineri, alteram potiùs methodum mihi selegi, quam hactenus etiam maximo cum fructu ægrotantium exercui. Quemadmodum enim pruna citò refrigerat, si dispersa dissipataq; fuerit: Sic citò refrigerant, (per accidens tamen, ut Galenus testatur) calida medicamenta discutiendo & extrahendo Empyreuma: Quandoquidem calor, ut Hippoc. scriptum reliquit, cutem emollit, extenuat, dolorem sedat, rigores, convulsiones mitigat, & ulcera ad suppurationem præparat, ideoq; etiam ijs partibus, quæ phlegmone infestantur, ejusmodi applicantur medicamenta, à moderato calore tamen, humores liquefieri, vias ac poros dilatari, idem Galenus testatur. Frigida item turpem, rugosam & lividam post se relinquunt cicatricem, ut ex Hippocrate ostendimus: calida verò non item.

Ut autem recta & methodica instituatür curatio combustionum, diligenter examinandi & inspiciendi sunt omnes effectus & accidentia combustionum, ut secundùm earum naturam remedia mutantur & applicentur, imprimis autem, quia propter solutionem continui, & subitam mutationem dolor subsequitur, qui violenter ad se attrahit ex corpore humores & sanguinem, necesse est repellentibus medicamentis, defensivis nimirum, & fascijs, in oxycrato, intinctis impedire, ne hujusmodi humores & sanguis in partem læsam confluant. Mox victus ratione, purgationibus, venæ sectione, cucurbitulis, alijsque

*Libr. 2. ad  
Glauc. cap.  
2.*

*Lib. 2. aphor.  
22.*

*Gal. meth.  
med. lib. 4.*

*Meth. med.  
lib. 11.*

*Gal. meth.  
med. lib. 12.*

*Meth. med.  
lib. 3. & 5.*

revulsionibus imminuantur, & ad alias partes trahantur & evacuentur humores & sanguis. Quantum ad topica attinet, in prima specie combustionum, si nondum elevatæ fuerint pustulæ, evocetur empyreuma, & humores acres, unguento ex cæpis & hujusmodi: si verò cutis combusta, contracta & indurata fuerit, diligentia adhibenda est, ut ea emolliatur, & lubrica efficiatur. Id autem fit medicamentis calidis & humidis, ut sequentibus capitibus fusiùs declarabimus.

---

*Curatio primi gradus Combustionum.*

CAPUT VI.

**P**rimum & præcipuum negotium quod in combustionib<sup>9</sup> est, ut Chirurgus impediatur, ne pustulæ oriantur, si enim id fieri possit, non est quod æger postea ullam molestiam vereatur. Itaq; quàm primùm quis igne, aqua, aut oleo fervido, aut simili quapiam re combustus, ac combustio levis fuerit, illicò locus ambustus aquâ, aut proprio sputo madefiat, & ad ignem admoveatur, ut incalascet, quantum ferre poterit, vel in aquam calidam immergat locum ambustum: aut si id fieri nequit, intingatur spongia aut linteum reduplicatum in aqua calida & applicetur loco ambusto: calor enim ille externus Empyreuma, hoc est, calorem ab igne in parte combusta

busta relictam, ad se attrahit, ut Aristoteles & experientia testantur. Quemadmodum enim contusus scorpio ictui suo impositus, venenum propriū ad se attrahit, sic calor calorem. Hinc cæpæ in mortario cum sale contusæ, & illicò loco combusto applicatæ, empyreumata extrahunt, nec sinunt ut pustulæ eleventur. Possunt & in talleolas scindi, & loco ambusto imponi, unus ad alterum, donec tota pars combusta sit cooperta. Sequens quoque unguentum empyreuma potenter extrahit, nec finit pustulas elevari.

℞. Cæpæ crudæ ʒj. β.

Salis

Saponis albi venetiana ʒ β.

Misceantur in mortario, fiatque unguentum cum ol. rosac. & amygdalar. dulc.

Anno 1604. cū dulcissima mea coniunx sapam in magno aheno coqueret ac ipsam spatula agitare vellet, ex improvise dextrā ad carpum vsque in sapam ebullientem immittit, ea autē manui tanto tenaciū adhærebat, quanto ad consistentiam ac spissitudinem cocta erat. Ideoq; illicò exortus est dolor vehemētissimus, non solū in ipsa manu, verū etiam toto brachio. Sapā ablotā calidā aquā, unguentum iam iam præscriptum (quod opportunè tū temporis in promptū mihi erat.) applicui, totum brachium oleo rosaceo unxi, & fasciā poscā intincta, involvi, sæpiusq; omnia illa reiteravi. Hinc divino favore, ex tanta combustione nulla sequuta est cutis exulceratio, præter duas parvas pustulas una in

*Unguentū.*

*Historia.*

pollice, altera in indice digito, quæ tamen parvo negotio unguento basilicone, curatæ fuere.

In combustionibus verò universalibus procedatur, quemadmodum sequenti exemplo declaratur.

*Alia historia combustionis universalis.*

Anno 1605. Paterniaci tinctoris cujusdam Magistri Joachimi nomine, famulus, in ahenum tincturâ calidâ plenum incidit. Hinc totius quidem corporis combustio sequuta est, sed quia tinctura non omninò fervida, illæ potissimum partes corporis, quæ fœcibus tinctoræ in fundo aheni præcipuè ferraturæ ligni quercini, quibus adhuc calor maximus inerat, inhæserant, veluti brachia & facies, combustæ fuerunt. Accersitus, illicò totum corpus, facie exceptâ, hoc unguento inunxi.

*Unguentum.*

℞ Saponis liquidæ ℥.β.

Cœpæ crudæ ℥ ij.

Salis ℥ j β.

Ol. de vitellis ovorum ℥ j.

Ol. rosac. &

Amygdalar. dulc. ana ℥ iij.

Mucilag. sem. cydonior. ℥ ij. Misce

Fiat unguentum.

Oculis sequens instillavi Collyrium anodinum:

*Collyrium.*

℞ Aquæ rosar. ℥ iij.

Aquæ plantag. ℥ j.

Sem. cydonior. &

Fœnogræciana ℥ β. Misce.

Maneant in Infusione supra cineres calidos  
per



per horam, deinde exprimantur, addaturque parum lactis muliebris, & oculis calidè instilletur. Reliquis verò partibus faciei unguentū quoq; ex Sapone, solidum tamen & spissum, ne ad oculos perflueret, eosq; læderet, applicui. Hujus autem unguēti talis est descriptio.

℞. Gummi elemi ʒj.

Ol. de vitell. ovor.

Rosar. ana ʒ iij.

Saponis albi & Veneti ʒ ij.

*Unguentū*

Dissolvatur gummi cū oleis, omnia in mortario diligenter commisceantur, fiatque unguentum, quod super linteum extensum, applicetur toti faciei, & de quatuor in 4. horas reiterentur emplastra; collyrium verò singulis horis. Eodem quoque die, exonerata prius alvo suppositorij beneficio, basilicā dextram incidi, & sanguinem ad uncias decem extraxi; erat enim vir robustus & plethoricus. Alterâ verò die sequens exhibui pharmacum.

℞. Electuar. diacathol. ʒvj.

Electuar. de succo rosar ʒ ij.

Syrupi rosati solut. ʒj.

*Potio purgans.*

Cum aqua cichorij & buglossæ, fiat potio, detur hora matutina cum custodia, & optimâ victus ratione.

Alterâ quoque & tertiâ die, simili unguento corpus totum bis inunxi, & faciei unguentum, quod præscripsi, applicui, oculisq; collyrium frequentissimè instillavi. Sed quia quibusdam in locis, præcipuè in brachijs combustio in profundum penetrârat, necesse fuit

ijſdem in locis, eandem, quam 7. & 8. cap. declarabimus curandi methodum, ſequi. His divino favore intra dies quatuordecim ex tanta combuſtione, pleniffimè ſanatus fuit.

Porro combuſtionibus faciei, unguentum ex cæpis minimè convenit: ex ijs enim oculi damnum atque jacturam non exiguam contrahunt. Itaq; loco ipſius unguenti, ſequens præparatur.

℞ ſaponis Veneti ℥j.

*Unguentum.*

Olei roſar. &

Amygdalar. dulcium ana ℥β.

*Nota.*

Miſce, fiat unguentum in mortario, addendo parùm mucilaginis ſeminis cydoniorum, extractæ cum aqua roſar. Notandum eſt Saponem mollem, quamvis in combuſtionibus minimè rejiciendus ſit, in facie tamen, nõ applicandum eſſe, liqueſcit enim, penetrat & offendit oculos, hanc quoque ob cauſam proſpiciendum eſt, ne præſcriptum unguentum nimis ſit liquidum. Nonnulli ut impediant, ne puſtulæ elevètur, linteum vernice intinctum, applicant illicò. Alii taleolis exlarido locum ambuſtum cooperiunt. Paulus Ægineta ſuadet linteum reduplicatum muriâ intingere, & applicare. Lixivium itè & aqua, in qua calx extincta fuit, idem efficiunt, ſed hujusmodi remedia ſæpiùs ſunt iteranda, & tepidè applicanda, ne linteamina ſiccata, in loco affecto, dolorem excitent.

*Facies pul-  
vere bõbar-*

Si Facies pulvere bombardico combuſta, & grana pulveris cuti infixæ fuerint, illicò extrahen-

trahendus est pulvis, quantum fieri poterit, *dico combu-*  
 idque acu, aut aliquo alio instrumento acu- *sta, quomodo*  
 to. Postea expectandum est, ut pustulæ ele- *do curanda.*  
 ventur. Sic enim quod reliquum est pulveris  
 in cute, parvo negotio extrahi, & cutis mun-  
 dificari poterit. Si verò Chirurgus in princi-  
 pio non advocatus fuerit, ita ut cutis iam ci-  
 catrizata, maculæ verò nigræ ex pulvere reli-  
 ctæ fuerint, necesse est denuò exulcerare cu-  
 tem; id autem commodè fiet, sequenti vesi-  
 catorio.

R̄. Cantharidum num. vj.

*Vesicatoriū.*

Fermenti ꝑ̄ ss.

Misce in mortario cum gutta una aut alte-  
 ra aceti, fiatque unguenti instar, de quo fiant  
 parva emplastra, quæ maculis applicentur. Sed  
 diligenter prospiciendum, ne ad oculos per-  
 veniat unguentum hoc. Cum primùm pustu-  
 læ fuerint elevatæ, incidendæ sunt forficibus,  
 postea acu aut aliquo alio instrumento acuto  
 eximendus est pulvis, tandemque applicandum  
 est sequens unguentum.

R̄. butyri sine sale ꝑ̄ j.

Unguenti basilic.

*Unguentum.*

Olei lilior. albor.

Devitell. ovor. ana ꝑ̄ ij. Misc. F. unguen-  
 tum.

Quotiescunque Chirurgus tractat ulcera,  
 prospiciat ut nigredinem pulveris diligenter  
 abstergat, aut cum decocto fœnogræci, &  
 florum meliloti abluat, postea applicet præ-  
 scriptum unguentum, atque ita procedat, do-

*Pulveris præcipitati usus in hoc casu.*

nec ulcera fatis sint mundificata. Ego hoc in casu aliquoties usus sum pulvere præcipitati, idque maximo cum fructu ægrotantium. Circumcirca verò ulcera, doloris leniendi gratiâ sequens applicetur unguentum anodynum.

℞ Olei amygdal. dulc.

Rosacei

*Unguentum Anodynum.*

Ceræ albæ ana ʒ. j.

Liquefiant, & misceantur, postea adde caphuræ ʒ. j. mucilaginis sein. cydonior. parum. Misce. Fiat unguentum.

Si verò pulvis in oculos impulsus fuerit, abluendi sunt lacte muliebri, aut aquâ rosac. tepidâ. Imprimis autem diligentia adhibenda est, ut affluxus humorum impediatur, & dolor leniatur, ut capite undecimo declarabimus.

Si verò pulvis in cutem impulsus non fuerit, sed cutis tantummodò ex flamma pulveris combusta, tunc illicò unguentum superius præscriptum ex Sapone, oleo, amygdal. dulc. & rosaceo, applicetur. Interim dum affectus ita tractatur, diminuendi & per alia loca educendi sunt humores noxij, & sanguis, ne ratione solutionis continui, & doloris in partem læsam confluant, inflammationemque & alia graviora symptomata excitent. Id autem cominodè fiet victus ratione, purgationibus, venæ sectione, cucurbitulis & defensivis, ut suo loco declarabimus.

*Curatio secundi gradus Combustionum.*

CAPUT VII.

**P**orro si Combustio altiùs penetraverit, ita ut non solùm pustulæ eleventur, verùm etiã cutis combusta, siccata, & contracta fuerit, tunc neq; cæpæ, sapo, sal, & quæ ex hujusmodi fiunt medicamenta, multò minùs etiã superiùs enarrata frigida & sicca, sed quæ cutem emolliunt, & lubricam reddunt, erunt applicanda; ea autem sunt temperata, calida scilicet & humida. Itaque hoc modo procedendum.

Imprimis pustulæ omnes forficibus incidantur, quò aqua acris & calida effluere possit, epidermis item ubicunq; separata est, abstrahatur, ne sub ipsa pus colligatur. Et quia illicò humores & sanguis ad locum affectum affluunt, necesse est ut affluxui illi humorum, defensivis adversetur. Applicetur itaq; unum ex sequentibus defensivis, ad latitudinem palmi minoris, supra locum ambulatum.

*R̄.* Pulv. boli armeni

Sang. drac.

Gallar.

Croci Martis

Acaciæ ana ʒ ß.

Ol. rosac. ʒ iij.

Ceræ novæ ʒj. ß.

*Defensivis.*

F. unguentum secundum artem, addendo parum aceti: Vel

R̄. Farinæ hordei

Argillæ fornac. ana ℥ ij.

*Aliud Defensivum.*

Coquantur cum aceto, & aqua ad formam Cataplasmatis, in fine admisce albumina ovorum. ij. Hoc defensivum singulis diebus bis aut ter reiteretur, ne in parte affecta exicetur, & dolorem excitet.

Toti verò loco ambusto imponatur sequens unguentum.

R̄. Unguenti basilicon. ℥ j.

*Unguentum.*

Ol. rosacei &

Lilior. albor. ana ℥ β.

Vitell. ovorum. num. ij. Misce.

Sequens quoque unguentum combustionibus summopere convenit, dolores mitigat, cutem emollit, & humores affluxos resolvit.

R̄. butyri recent. sine sale

Pinguedinis gallinæ recent. ana ℥ j.

Ceræ novæ,

*Aliud.*

Ol. liliorum alborum ana ℥ β. Liquefiant simul, postea admisce croci ℥ j. mucilaginis sem. cydonior. ℥ j. Misceantur in mortario, fiatq; Unguentum.

Si verò dolor adeò vehemens fuerit, ut æger nihil, aut parum dormire possit, admisceatur prædicto unguento opij dissoluti ℥ β.

Aut R̄. Butyri recent. ℥ ij.

Ol. Amygdalar. dulc.

De vitellis ovorum. ana ℥ β.

*Unguentum.*

Croci, opij ana ℥ β.

Capo.

Caphoræ ʒj.

Mucilaginis sem. cydonior. ʒj.

Misce. Fiat unguentum, &amp; applicetur.

Applicato defensivo, & uno ex præscriptis unguentis, pars affecta involvenda est, fasciâ in oxycrato, madefactâ. Et quidem brachio aut crure laborante, ab infima parte incipiendum, hoc enim modo reprimuntur humores, qui iam in partem læsam influendam, præparati sunt. Si verò combustio aliqua in parte fuerit, quæ fasciâ amplecti non possit, intingendum est linteum reduplicatum in oxycrato, & applicandû singulis diebus ter aut quater. Aqua item in qua caules conservantur (quæ fit ex aceto, aqua, & sale) si in ea intincta fuerint linteamina, & applicata, mirum in modum humores reprimunt, dolorem lenit, & empyreumati adversatur. In facie tamen huiusmodi medicamenta, ubi acetum & sal ingreditur, propter oculos, non sunt applicanda. Emollitâ & satis lubricâ factâ cute, dolore quæ lenito, nonnulli exiccantibus medicamentis, veluti unguento ex calce lota, diapompholygos, albo Rhafis, & similibus, cicatricem inducendam esse volunt. Verùm enim verò, quia huiusmodi exiccantia cutem contrahunt, & cicatrices turpes efficiunt, usus eorum medicamentorum mihi nō probatur.

Vt igitur ut plurimum emollientibus usque ad finem curationis. Præparo quoque unguentum ad omnes combustiones præstantissimum, hunc in modum.

℞. Butyri recent. & loti in aq. rosac. ℥. iij.

Ol. violacei

De vitellis ovor.

Amygdalar. dulc. ana ℥ β.

Farinæ hordei ℥ j. β.

Croci ℥ j.

Mucilaginis sem. cydonior. ℥ j.

Ceræ q. s. F. unguentum in mortario.

Hoc unguentum emollit, dolorem lenit, & paulatim cicatricem inducit. Sed quia combustiones, imprimis quæ in cutis sunt superficie, vehementissimo sensu sunt præditæ, videant Chirurghi, ut blandè ulcera abstergant. Ego ne abstergendo ulcera, excitem dolores, tela subtilissima, qualis est Cambriacensis, aut syndone cooperio totam partem ambustam; nec illam amoveo donec ulcera sint sanata, per hanc telam pus facilimè effluit, & virtus medicamentorum ad ulcera pervenit.

Dum verò locus ambustus, uti dictum est, curatur, victus ratio, purgatio humorum, & venæ sectio, minimè erit negligenda. A falsis omnibus vehementer calidis, & acribus, & quæ difficilis concretionis sunt absteineat. Utatur iusculis carniū recentium, in quibus Acetosa, Endivia, Lactuca & Borrago coxerint. Bibat phtisanam, aut cervissiam minimè generosam. Si plenitudo adest, incidatur Basilica, aut Mediana, extrahaturq; sanguis, prout vires consentiunt. Si purgare necesse est, purgetur secundùm humoris prædominantis naturam, de quibus Medicus consulendus



lendus est. Si combustio in facie fuerit, cucurbitulæ spatulis erunt applicandæ, ut sanguis & humores retrorsum trahantur.

---

*Curatio tertij & ultimi gradus  
Combustionum.*

CAPUT VIII.

**P**ericulosus est tertius & ultimus hic gradus combustionū, propterea quod nō nunquam degenerat in Gangrænā & Sphacelum. Primò enim ratione caloris vehementiæ, exiccatur & consumitur humidum radicale, & innatum calidum. Secundò exiccantur & contrahuntur Cutis, Caro musculosa, venæ & arteriæ, ut sanguis per eas in partem læsam influere minimè possit. Tertio concurrunt ratione doloris & solutionis continui humores & sanguis, augentque incendium. Hinc ex penuria alimenti, & suffocatione calor nati emoritur pars affecta, quemadmodum in Tractatu de Gangræna & Sphacelo monstravimus. Anno 1592. incidit in manus honestissima matrona in Hilden/ illa propter negotia domestica defatigata sola, ad focum sedens, & syncope correpta, in terram decidit, dextrum verò crus in prunas projectum est, hinc sura ita combusta fuit, ut paulò post, quia corpore crassa & cacochymica erat, Gangræna & Sphacelo correpta fuerit, *Tertius gradus combustionum periculosus tribus potiss. de causis.*

1.

2.

3.

*Historia.*

rata tamen eschara, & applicatis, quæ ad Gan-  
grænam pertinent, sanitatem recuperavit.

Inprimis igitur pustulæ omnes sunt inci-  
dendæ, & aqua ratione combustionis conflu-  
xa. spongiâ vel linteo exiccâda. Postea eschara  
leniter est separanda, aut ad minimû in diver-  
sis locis ferè ad carnem usque incidenda, quò  
humor acris sub crusta retentus effluere, me-  
dicamenta penetrare, & quicquid à calore in-  
duratum, emolliri possit. Separatio autem illa  
escharæ primo aut secundo die fieri debet,  
antequam pars affecta infletur: sequens quo-  
que unguentum statim ab initio est appli-  
candum.

*Unguentum.*

℞. Butyri rec. & loti in aq. ros. ℥ iij.

Unguenti basiliconis ℥ j. β.

Ol. lilior. albor.

Amygdal. dulc. ana ℥ β.

Vitellum unius ovi. Misce & applica.

Postea linteum reduplicatum in sequenti e-  
mulsione intinctum, repidè applicetur. Sedat  
enim dolores, emollit, & affluxionem humo-  
rum reprimat.

*Emulsio.*

℞. Medullæ sem. cucurb. ℥ ij.

Sem. cydonior.

Fœnogr. ana ℥ j.

Contundantur in mortario, & cum ℥vj. aque  
puræ colentur, fiatq; Emulsio, in qua dissolve  
Saponis Veneti, albi ℥ β. caphuræ ℥ β. Si verò  
combustio in facie fuerit, sapo minimè est ad-  
dendus, propter oculos, sed ejus loco adda-  
tur parum aq. rosar. & plantaginis.

Defen-

Defensiva statim ab initio sunt applicanda, & fasciæ in posca intingendæ, ut impetus affluxus humorum impediatur. Si verò pars affecta iam inflata fuerit, præcipuè verò si venæ & arteriæ ab igne sunt contractæ, non usque adeò probantur defensiva, nisi aliquid, quod vim habeat resolvendi, cujusmodi sunt farina fabarum, lupinorū, lollij & pulvis flor. chamom. &c. ijs admixtum fuerit. Utatur æger victu tenuissimo, purgentur item humores noxij cathartico secūdum humoris prædominantis naturam. Incidatur vena, & cucurbitulæ applicentur, de qua re Medicus consulendus.

Cum primùm autem affluxus humorum & sanguinis ex parte remiserit, ab usu defensivorum desistendum est, quò spiritus & nutrimentum eò meliùs possint in partem læsam influere, escharamq; digerere, atq; separare, ubi chirurgus, minister naturæ, singulis diebus, quantum absque dolore fieri potest, aliquid ab escharam excidere debet, postea præscriptum unguentum ex butyro recenti, &c. imponere. Sequens quoque fomentum non habet exiguam vim sedandi dolorem, cutem emolliendi, & digestionem promovendi.

℞. Radicum althææ ℥ ij.

Semin. cydonior.

Fœnogræci ana ℥ β.

Flor. Chamom.

Meliloti ana M. j.

Coquantur in aqua, aut si dolor vehemens fu-

*Fomentum.*

erit, in lacte vaccino, deinde spongiâ in adfectâ in decocto, applicetur calidè: potest & admisceri aliquid olei lilior. alborum. Si verò combustio adeò magna fuerit, ut in Gangrænam & Sphacelum degeneret, tunc curatio Gangrænae, ex Tractatu nostro, de Gangræna est petenda. Sed quia hujusmodi combustiones, quemadmodum diximus, sæpissimè in Gangrænam degenerent, ideoq; cautè & cum judicio in ijs procedendum est, & semper aliquid applicandum, quod putredini ad-  
versetur.

In pueris mihi aliquoties acciderunt combustiones manuum & pedum, in quibus extremitates digitorum planè combustæ fuerunt. In his autem diligentia adhibenda est, ut quicquid ita combustum, maturè separetur, ne putredo partes sanas invadat. Itaq; si caro & os usque ad articulum adeò combusta fuerint, ita ut conservari non possint, incidendum est os novaculâ in ipso articulo, non autem tenaculis, ut nonnulli voluerunt. Si articulus ipse quoq; affectus fuerit, retrò articulum, caro novaculâ, os verò minutissimâ ferrâ incidatur. Cur autem abscissio hæc scalpellis fieri non debeat, in Tractatu nostro de Gangræna declaravimus, ubi etiam modum abscindendi digitos monstravimus. Quamprimum autem eschara separata fuerit, operæpretium est primò mundificare ulcus, quapropter si putridum ac fœtidum fuerit, æger robustus, & affectus in parte non usque adeò sensibili,

sensibili, solebam applicare Ægyptiacum. Si verò æger delicatulus, & affectus in loco sensibili, temperandum est unguentum prædictum melle rosac. Pulvis item præcipitati lotus in aqua rosac. præstantissimum est medicamentum ad omnia ulcera putrida. Aut

*Pulvis præcipitati præstantissimū in ulceribus putridis.*

℞. Pulveris præcipitati

Radic. aristoloch. rot.

Farinæ hordei ana ʒ j.

Cum melle rosac. parumq; therebinth. lotæ, fiatq; unguentum. Si combustio in capite aut facie fuerit, addatur parum gummi Elemij in oleo ros. dissoluti. Mundificativum item nostrum de succo Apij, mirum in modum mundificat ulcera putrida, uti & mel rosar. cum aqua vitæ mixtum & applicatum: Hujusmodi autem medicamenta xylone aut filamentis suavibus ulceribus imposita, lintheaminibus suavibus reduplicatis, aut spongia molli involvenda est pars affecta; attrahunt enim hujusmodi lintheamina, & spongia humores ferrosos, qui consolidationem impediunt. Mundificatis ulceribus, incarnantibus, uti convenit, quale est unguentum aureum, Nicotianæ, aut sequens pulvis.

*Vide tractat. de Gæg. cap. 16.*

℞. Pulv. aloes

Sarcocollæ

Myrrhæ ana ʒ ij. Misc. F. Pulvis.

Sequens quoq; viscus mirum in modum mundificat, & incarnat, quæcunque fuerint ulcera putrida.

*Pulvis Sarcoticus.*

℞. Herbarum Cétaurij & Hyperici cū toto

Diapensia,  
Alchymilla  
Beta sylvest.

Folior.arnoglossæ majoris ana M.iiij.

Radic.Tormentilla

Aristolochiæ longæ ana ꝑ iij.

Incidentur & contendantur omnia, postea in vas vitreum projecta, superinfundatur vini tantum, ut supernatet, digeranturq; in sole per dies tres, deinde coquantur lento igne, donec tertia pars sit consumpta, colaturam cum fortissima expressione infunde in alembicum vitreum, & in Balneo Mariæ fiat viscus.

Tandem inducenda est cicatrix, non autem ijs quæ vehementer exiccant, qualia in alijs ulceribus Chirurghi uti consueverunt; vehementer enim exiccantia in combustionibus, cicatricem rugosam ac turpem efficiunt. Applicetur igitur sequens unguentum.

R. Emplastri palmei ꝑ ij.

Pingued. Gall.

Et anser. ana ꝑ ß.

*Unguentum.*

Liquefiant simul. Deinde admisce

Aluminis usti

Saturni calcinati

Lythargirij aurei

Lapidis calaminaris ana ꝑ j.

Et in mortario plumbeo F. unguentum, addendo mucilag. sem. cydonior. & fœnogræci, quantum excipere possit, fiatq; unguentum, quod in omnibus combustionibus præstantissimum est. Unguento Alabastrino quoque hoc

hoc in casu sæpissimè usus sum magno cum fructu, cuius est descriptio.

℞ Lapidis Alabastritis calcionati ʒj. β.

Pumicis albi calcionati ʒ β.

Aluminis usti ʒ ij.

℞. Omnium tenuissimus pulvis. Postea

℞. Cerae albæ

Sevi cervini

Ol. amygdalar. dulc.

Lilior. albor. ana ʒ j.

Ol. de vitell. ovor. ʒ β.

℞. unguentum s.a. Hoc unguentum emollit, dolorem lenit, & cicatricem pulchrâ inducit.

Si Combustio ad supercilia, labia, aut in digitis fuerit, diligētia adhibenda est, ne huiusmodi partes contrahantur, & ad invicem conglutinentur. Itaq; linteamina & filamenta, aut laminæ plumbeæ subtilissimæ fabricatæ, partibus ubi cōglutinationis est periculum, sunt interponendę. In magnis combustionibus ad magna vasa arteriarum & venarū, ubi Atrophia ex penuria alimenti metus adest, tota pars affecta primis quidem diebus oleo rosac. ad reprimendos humores, postea verò sequēti unguento inungenda est.

℞. Succilumbricor. ʒ ij.

Pingued. humanæ

Gallinæ

Ursiana ʒ j.

Aquæ vitæ ʒ ij.

Misc. Hoc unguentū emollit, resolvit, corroborat, & aperit, si quæ venæ & arteriæ pro-

*Unguentum  
Alabastrini  
descriptio.*

*Unguentum.*

pter violentiam ignis contractæ & opilatæ fuerint; atq; proinde Atrophiam impedit.

---



---

*De Combustionibus ad oculos.*

C A P U T I X.

**Q** Vanto nobilior corporis nostri pars aliqua existit, tanto major adhibenda est diligentia, cum malè afficitur. Oculus itaq; quia nobilissimum est membrum, & valdè sensibile, particularem quandam requirit curationem. Inprimis autem Chirurgus in toto hoc labore negotio, ut dolori, & affluxui humorum & sanguinis resistat. Ideoque statim ab initio defensiva fronti & temporibus applicare, & pustulas omnes incidere debet, quò aqua acris & calida effluere possit. Oculis verò tepidè instillet continuo lac muliebri cum aqua rosac. mixtum, in qua parum croci integri maceratum fuerit. Linteū item reduplicatum, & in hoc lacte madefactum, oculis tepidè applicet, & reiteret, quotiescunq; siccum fuerit, aut,

℞. aq. rosac. ℥ iij.

Sem. cydonior. &

Fœnogr. ana ʒ β.

Croci integri ʒ β. Misceantur.

Maneant in infusione horas 4. deinde exprimantur. Huic mucilagini admisceatur parum lactis muliebris, deinde tepidè oculis instilletur, & linteis reduplicatis applicetur oculis.

*Collyrium.*



oculis. Si dolor magnus est, addantur grana tria aut quatuor opij dissoluti in aqua rosac. sanguis item columbinus calidè oculis instillatus, dolorem lenit. Tandem applicetur sequens Cataplasma.

℞. pulpæ malor. dulc. sub prunis decoctorum ℥ ij.

Farinæ fœnogr. &

Hordei ana ℥ β.

*Cataplasma.*

Coquantur in lacte vaccino ad formam cataplasmatum. In fine admisceantur Croci ℥ β. vitellum unius ovi, parumq; olei rosac. & calidè applicetur. Circumcirca tamen oculos si combustio levis adsit, applicari potest Unguentum aliquod ex sapone, quod tamen solidum satis sit, ne liquando oculos offendat.

Hic processus non est mutandus, donec ab inflammatione & dolore tutus sit æger, postea applicetur sequens collyrium, ad maiorem exiccationem, & visus corroborationem.

℞. Aquar. Euphrasie

Fœniculi

Rosarum ana ℥ j.

Tutie præparat.

Sief albi sine opio ana ℥ j.

Misce. Fiat Collyrium.

*Collyrium.*

Sciat autem Lector, Collyria, in quibus ingreditur lac muliebre ætate singulis, Hyeme verò alternis diebus mutanda esse: facilè enim acescit lac, & acrimoniam acquirit, tunc dolorem non lenit, sed excitat. Hanc quoque ob causam acria illa, quæ in reliquis combustio-

nibus præscriptimus, qualia sunt lixivium, muria, &c. in combustionibus faciei non sunt applicanda.

A narcoticis item, nisi dolor magnus adfuerit, quantum fieri poterit, abstinendum est; quandoquidem illa propter summam suam frigiditatem incrassant ac condensant humores & spiritus visivos oculorum. Si verò cutis ad oculos indurata fuerit, emollienda & lubrica facienda est, idq; superius enarratis unguentis. Adhibenda tamen est diligentia, ne unguenta aut pingua intrent in oculos, excitant enim dolorem. Interim dum cutis emolliatur unguentis & oleis, instillentur collyria, & applicetur cataplasma, quemadmodum diximus. Quamprimùm crusta abscesserit, consolidanda sunt ulcera, quemadmodum præcedenti capite declaravimus, id tantùm addo, unguentis ad oculorum & capitis ulcera semper aliquid gummi Elemii commiscendum esse, est enim præstantissimum medicamentum ad hujusmodi partium vulnera. Diligentia quoque adhibenda est inter curandum, ne palpebræ retrahantur, id enim maximam deformitatem adferret. Ideoq; tota facies inungenda est, unguento quodam emolliente, veluti hoc.

℞. Gummi Elemii ʒj.

Ol. lilior. albor.

Pingued. ursiana ʒj.

Mucilag. sem. fœnogræci ʒij.

Liquefiant læto igne, colentur & fiat unguentum,

tum. Sequens quoque fomentum ad idem valet.

R. Folior. & radic. altheæ

Malvæ

Brançæ ursinæ

Flor. meliloti ana M β.

Sem. fœnogræci &

Lini ana ʒ β.

*Fomentum.*

Coquantur in aqua spongia madefacta, calidè applicetur, postea inungatur facies superiori unguento. Fomentatâ & inunctâ facie, paulatim cutis extendatur ambabus manibus, non secus ac pelliones pelles extendere solent.

Quantum ad universalia, imprimis utatur æger victu acutissimo, tum ab omnibus calidis, salitis, pipere, Zingibere, garyophyllis, aliis, cæpis, raphanis & similibus, sale conditis, tum quæ difficilis sunt digestionis, absteineat. Vinum item & cervisia generosa nocent. Bibat Phtisanâ, in qua aliquid seminis coriandri præparati, sem. anisi coxerit. Si æger à vino propter ætatem abstinere non possit, eligat sibi vinum album, & minùs generosum. Cum iusculis coquantur herbæ quæ refrigerant, & bilem reprimunt, quales sunt Acetosa, Borago, Cichorium, Ceresfol. radic. petrosel. fœniculi, Maiorana, Rosmarin. & Euphrasia. Post pastum sumat æger parùm mivę cydoniorum simplicis, aut conservæ rosarum antiquæ, ut elevatio vaporum ad caput impediatur. Si sitis urgeat, utatur decocto suo hordeaceo, in

quo dissolutus sit Syrupus de succo Acetosæ, aut Limonum vel Granatorum. Cerasa item condita, rob de ribes, de Berberis & alia hujus generis simplicia conveniunt, corpus purgetur Electuariis lenitivis, cassiâ, mannâ, Syrupo rosato solutivo, & similibus. Clysteres item & suppositoria, quia materiam deorsum trahūt, summoperè conveniunt. Incidatur Cephalica in brachio, applicentur ventosæ scapulis, & vesicatoria post aures, somnus summoperè convenit oculorum morbis. Contrà verò vigiliæ & splendor Solis nocent, idèoque cubiculum, ut tenebrosum sit, operæpretium existit. Porrò antequàm huic capiti sit emponam, in gratiam tyronum exemplum Combustionum non adèò vulgare, in medium adferam.

*Historia.* Puella duorum annorum ætatis suæ aut circiter, filia Domini Samuelis Gaillardi Ludimagistri apud Neocomenses vigilantissimi, compatris mei plurimè in honorandi, ad focum sedens, in prunas decidit, unde non solum frons circa oculos, verùm etiam tota ferè facies, potissimum ex una parte, graviter combusta fuit. Ego momento ipso accersitus, illicò sequens unguentum in linteum extensum toti fermè faciei, in formam emplastri, applicui.

Rx. Saponis Veneti ʒj.

Ol. de vitellis ovar. &

Amygdalarum dulc. ana ʒ. ij.

Gummi elemi dissoluti cum oleis ʒj.

Misce

*Unguentū.*

Misce. Fiat unguentum, addendo parùm mulcilaginis seminis cydoniorum.

Oculis verò Collyrium ex lacte muliebri, parumq; aquæ rosar. continuò tepidè instillare, & linteis suavibus reduplicatis applicare iussi. Primâ die singulis horis quatuor emplatra renovavi, hinc major empyreumatis pars evocata fuit. Die secundâ, pulveris radicum mechoacæ  $\mathfrak{z}$  j. ex insculo carnis recentis exhibui, parti verò affectæ, sequens applicui unguentum.

R̄. Ol. de vitellis ovorum

Ol. Amygdalar. dulc.

Pinguedinis ursi, &

Pingued. humanæ ana  $\mathfrak{z}$   $\beta$ .

Gummi Elemi, dissoluti cum oleis  $\mathfrak{z}$  ij.

Ceræ novæ  $\mathfrak{z}$  j.

Croci  $\mathfrak{z}$  j.

Misce, fiat unguentum, quo solo curationem ferè absolvi, nisi quòd circa finem curationis eidem unguento aliquantum farinæ lentium maioris exiccationis gratiâ, admiscuerim, totam quinetiam partem ambustam aliquando sequenti Unguento emolliente inunxi.

R̄. Gummi Elem.  $\mathfrak{z}$   $\beta$ .

Ol. de vitell. ovorum &

Liliorum albor. ana  $\mathfrak{z}$   $\beta$ .

Pingued. humanæ  $\mathfrak{z}$  ij.

Misce.

Interim dum cutem ita emollirem, sæpissimè illam ambabus manibus extendebam, quemadmodum pelliones pelles, dū illas ad-


*Collyrium.*

*Aliud Un-  
guentum.*

*Aliud Un-  
guentum.*



ornant, extendere solent. Sic divino favore curata fuit, ita quidem ut nullum relictum sit vestigium combustionis, nisi minimum in superiori labello, quo in loco medicamenta, propter impatientiam pueri, contineri non potuerant.



*De Combustionibus Inguinum.*

C A P U T X.

**I**nguina, quia membra sunt rara, laxa, humida, & fluxionibus obnoxia, atque ita facile putrescentia, particularem quoque diligentiam & methodum curandi requirunt. Inprimis autem, quia propter vicinitatem Emunctoriorum ibi humores illicò concurrunt, applicandum est statim ab initio defensivum ad imum ventris supra combustionem, vena in cubito incidatur, & vomitus si fieri potest, provocetur; sin minus per inferiora leviter purgetur æger, & victus tenuissimus instituat: à vino generoso, & à cibis calidis & acris abstineat, quemadmodum superiori capite declaravimus. Topica inguinum, quia membra sunt rara, laxa, humida & corruptioni obnoxia, ut magis, quàm in aliis combustionibus exiccent, & putredini adversentur, necesse est. Itaque si pustulæ nondum elevatæ fuerint, applicetur illicò unguentum aliquod ex sapone, & cæpis præparatum: si verò iam elevatæ fuerint, incidantur, quò aqua acris effluere

effluere possit. Postea applicetur sequens unguentum,

℞. Unguenti rosati ℥j.β.

*Unguentum.*

Ol. de vitell. ovor. &

Amygdal. dulc. ana ℥β.

Liquefiant, quibus admisce

Myrrhæ

Aloës ana ℥j. Misce & applica cum filamentis, postea cooperiatur tota pars affecta sequenti cataplasmate.

℞. Farinæ hord. &

*Cataplasma.*

Fabar. ana ℥iij.

Pulv. rosar. rub. ℥β. cum oxynellite fiat cataplasma, quod calidè applicetur.

Si autem combustio insignis fuerit, ita ut inducta sit crusta, separanda est paulatim scapello, aut ad minimum ubique scarificanda, postea applicetur sequens unguentum ad casam Escharæ.

℞. Superioris unguenti ℥ij.

*Unguentum.*

Pulveris scordii ℥j.

Unguëti Ægyptiaci ℥ij. plus aut min⁹, prout putrefactio magna, & æger robustus, aut debilis fuerit. Misce & applica cum filamentis, postea

℞. Farinæ lupinor.

Fabarum

Lolii ana ℥j.β.

*Cataplasma.*

Coquantur cum lixivio barbitonfor. Tandem admisce,

Pulv. Scordij

Aloës

Myrrhæ ana ꝑ β.

Misce fiat cataplasma, quod calidè applicetur. Post escharæ casum, mundificetur, incarnetur, & cicatrifetur ulcus, quemadmodum capite octavo declaravimus.

---

*De Combustionibus Juncturarum.*

C A P U T X I.

**I**uncturis, quia partes sunt nervosæ, & maximo sensu præditæ, statim ab initio defensiva applicanda, corpus purgandum, vena incidenda, & victus ratio instituenda est, quemadmodum superioribus capitibus de Combustionibus oculorum & inguinum declaravimus; medicamenta ex sapone, cæpis & hujusmodi acrioribus (nisi combustio levis fuerit) minime sunt applicanda, sed emollientibus, lenientibus & anodinis tractanda est pars affecta. In magnis autè Juncturarum combustionibus diligenter prospiciendum est, ne nervi retrahantur & iuncturæ incurvantur: ideoq; totum membrum bis in die inungendum est oleo lumbricorum, anethi, liliorum albor. axungie humanæ, ursi, gallinarum, caponum, unguento dialthæ & similibus, ut quæcunque indurata, lubrica reddantur, atq; retineantur. Interim quoque ferulæ, aliæque instrumenta apta, ex ligno fabricata, circumcercâ juncturas ponenda sunt, ut retractio nervorum impediatur. Blandè tamen omnia agenda,



agenda, ne dolor excitetur, qui si supervenerit, protinus sedandus est ijs, quæ sequenti capite describuntur remedijs, reliqua ex superioribus petenda sunt.

---



---

*De dolore ejusq; curatione.*

CAPUT. XII.

**G**Ravissimū symptoma dolor est, tum in cōbustionibus tū in omnibus alijs affectibus: dissipat enim & absomit spiritus vitales, inquietudines & febres excitat, hinc sequuntur animi deliquia, fluxiones attrahit, inde inflāmatio, phlegmone, convulsio, aliaq; graviora symptomata oriūtur, est igitur, quantum fieri potest, leniendus. Generalis autem curatio doloris est ablatio ejus causæ. At quia in combustionibus binæ concurrunt causæ, nimirum subita alteratio, & solutio continui, duplex quoq; erit curandi scopus: primò ut empyreuma ab igne relictū, eliciatur, & pars affecta refrigeretur, & ad temperiem suam revocetur, quemadmodum antea satis declaravimus. Secundò, ut quicquid disjunctum aut combustum est, uniatum & consolidetur. Sed quia empyreuma exhalari, multò minùs pustulæ & ulcera sanari minimè possint, nisi prius indurata & contracta cutis, emollita & lubrica reddita fuerit, necesse est ut Chirurgus totus in hoc incumbat, ut superioribus recitatis medicamentis calidis & humidis, cu-

tem lubricam & mollem reddat, quò humores acres & subtiles possint per poros exhalari, & absumi. At quamvis hujusmodi medicamenta calida sint, refrigerant nihilominus, per accidens tamen, hoc est, ut Galenus testatur, resolvendo & dissipando humores acres. Itaque si dolor magnus fuerit, atque ijs, quæ cap. 7. & 8. præscripsimus, non sedetur, necesse est, (purgato tamen priùs corpore, & venâ incisâ, si ætas aliâq; permittant) sequens applicare fomentum.

*Fomentum.*

℞. Radicum altheæ ℥ j.

Florum chamomil.

Meliloti

Rosarum

Abfynthij ana M. ℞.

Sem. fœnogr.

Anethi ana ℥ β.

Ol. violar. ℥ iij.

Coquantur in lacte vaccino, in quo spongia intincta, aut linteum reduplicatum sæpius calidè interdiu loco dolenti applicetur. Sequens quoque cataplasma mirum in modum dolorem lenit.

℞. Micarum panis albi ℥ β.

*Cataplasma.*

Coquatur in lacte vaccino, ad formam pultis, postea admisce olei amygdalar. dulc. butyri rec. ana ℥ j. ol. de vitellis ovor. ℥ β. croci ℥ j. vitellum unius ovi. Misce, Fiat cataplasma, quod calidè applicetur, ter aut quater in die, fomentato tamen priùs loco affecto, superiori fomentatione. Si pinguedo humana in prom-

ptu

ptu sit, poterit ejusdem aliquid admisceri, est enim singulare anodynum.

Defensiva quoque sunt applicanda; victus tenuis instituendus, & corpus purgandum est, secundum humoris prædominantis naturam, vena item incidenda, & cucurbitulæ applicandæ. Si verò dolores hisce non mitigentur, ad Narcotica transeundum est; ea autem, quia frigida sunt ad quartum gradum usque, non immeritò suspecta habentur, applicata tamen cum ratione & prudentia, periculo vacant, præcipuè in externis partibus, à levioribus tamen incipiendum, ideoque

℞. Florum Nymphæ

Folior. hyosciami &

Papaveris, ana quantum volueris.

*Cataplasma  
Narcoticū.*

Involventur herbæ panno madefacto, & sub cineribus calidis parum coctæ, pistentur in mortario, addendo parum olei rosacei, nymphæ, unguenti populeonis, & applicentur loco dolenti, sint tamen ulcera vel crustæ prius coopertæ unguento quodam ad casum escharæ, ne natura hujusmodi frigidis in separanda eschara, & digerendis ulceribus, remoret. Aliud cataplasma narcoticum.

℞. Micarum panis albi ℥ β. Coquatur in lacte vaccino ad formam cataplasmatiss, cui admisce opij dissoluti in aqua papav. albi ℥ ij. croci & castorij ana ℥ j. vel

*Aliud  
Cataplasma  
Narcoticū.*

℞. Herbar. cicutæ,

Solatri

Hyosciami

Papav. ana M. j.

Coquantur in lacte vaccino, postea pistentur in mortario, coquanturq; parum cum ꝑ ij. farinae hord. ad formam cataplasmatidis, cui admisce opij dissoluti in aq. papav. ꝑj. croci ꝑj. Misce & applica tepidè.

---

*De imbecillitate visus.*

*C A P U T X I I I.*

**Q**uia sæpissimè post combustiones faciei, imbecillitas visus, & lachrymatio oculorum sequuntur, ideò opere preteritum est, paucis declarare, quomodo eis sit occurrendum, ne in fistulas lachrymales, ophthalmiam & suffusiones degenerent, aut visum planè auferant. Curatio autem his tribus intentionibus, diætà scilicet, purgationibus & Topicis medicamentis, perficitur. Et quia in lachrymationibus oculorū, cerebrum humores mittit, oculi verò eosdem recipiūt, necesse est, ut omnimodo prohibeatur, non tantum, ne humores pravi in corpore & cerebro generentur, verum etiam ut qui iam generati sunt, & ad oculos defluunt, exiccantur, atque deorsum trahantur. Interim quoque oculi corroborandi sunt, ne fluxionem excipiant.

*Prima Intentio.*

Quantum ad Diætam, imprimis eligendus est aër temperatus: calidus enim humores in capite liquefcit, excalescit, subtiles, acres, & ad flu-

ad fluxionem aptiores efficit: frigidus verò poros claudit, exhalationemque impedit, sed imprimis cerebrum comprimit, hinc vehementes fiunt fluxiones. Quemadmodum enim spongia imbuta aquâ, si manu comprimitur, vi quadam aquam emittit. Sic excrementitij humores è cerebro frigore compresso, erumpunt. Ideoque si anni tempus frigidum fuerit, calefaciendum est cubiculum, sin calidum, inspersâ aquâ frigidâ, & substratis frondibus, herbis & folijs, refrigerandum. Australis item, & Aquilonaris ventus nocent: ille enim præ sua humiditate, cerebrum implet humoribus, hic frigiditate, cerebrum comprimit, & exhalationem impedit.

In cibi administratione tria hæc, Quantitas nimir. Qualitas & usus observanda sunt. Primò enim excessus omnis, tum cibi, tum potus vitandus est. Secundò, quia fluxiones oculorum semper fiunt ex superfluis humoribus, ut cibus habeat qualitatem & vim exiccandi, necesse est. Quòd si fluxus ex humoribus frigidis fuerit, cibus nonnihil calefacere, si ex calidis & acribus, refrigerare debet. In genere autem nocent, quæcunque sunt difficilis concoctionis, & sale, aromatibus, cæpis, allijs, raphano, synapi & similibus condita, & cocta, item quæcunq; flatu procreant, & caput vaporibus implent. Tertiò observandum est, nunquam edendum esse, nisi prior cibus probè concoctus fuerit, naturalis appetitus adfuerit, varia quoque ciborum genera, quæ

substantiâ aut qualitate differunt, uno pastu  
 conjungi non debent, panis sit ex optimo tri-  
 tico benè fermentatus & coctus. A carne sa-  
 lita & infumata absteineat, præsertim à porci-  
 na. Convenit recens caro bouum castratorum,  
 Caponum, & avium in arboribus viventium.  
 Cum carne aliisque iusculis coquantur hyssop-  
 us, maiorana, salvia, rosmarinus, euphrasia,  
 radix petrolelini, pimpinellæ, & similia. Si au-  
 tem defluxus ex humore subtili & acri fuerit,  
 coquatur cum carne & iusculis, Borrago, bu-  
 glossa, acetosa, cerefolium, calendula, euphra-  
 sia, radix fœniculi & petroselini.

Reliqua olera, ut sunt lactuca, portulaca,  
 caules, item cucurbitæ, melones, cæpe, por-  
 rum, allium, sinapi, raphanus, in defluxioni-  
 bus oculorum, summoperè nocent, uti & pi-  
 per, Zingiber, garyophilli, legumina, & lacti-  
 cinia propter butyrum.

Vinum generosum, uti & Cerevisia gene-  
 rosa nocent, utatur cerevisiâ minimè genero-  
 sâ, sed benè coctâ, aut pthisanâ, in qua agri-  
 monia, euphrasia & pruna coxerint, postea a-  
 liquantum dulcoretur Saccharo, & aromati-  
 zetur cinamomo. Si verò æger ratione ætatis,  
 aut imbecillitatis ventriculi à vino abstinere  
 non possit, eligat sibi vinum aliquod album  
 vetus, & minus generosum. Somnus & quies  
 summopere conveniunt in oculorum mor-  
 bis: vigiliæ verò & studia, præcipuè statim à  
 cibo, nocent, uti & actus venereus.

Secundò digeratur, præparetur, & evacue-  
 tur

tur humor noxius, qui ad oculos defluit, id-  
 eoque si defluxio ex humore acri & calido fu- *Secunda in-*  
 erit, digeratur sequenti Iulapio. *sentio.*

℞. aquar. betonicæ

Euphrasiæ

Borraginis

Acetosæ ana ʒ ij β.

Syrupi de Nymphæa

Violatij &

de cichorio ana ʒ β.

*Julepus.*

Misce fiat Iulapium pro duobus matutinis,  
 postea purgetur sequenti potiuncula.

℞. electuar. diacathol. ʒ iv.

diaphœnic. ʒ ij.

Syrupi ros. solut. cum rhabarbaro & aga-  
 rico ʒ ij. Cum aqua aut decocto betoni-  
 cæ & euphras. Fiat potiuncula.

*Potiuncula  
 purgativa.*

Vel dentur pillulæ sequentes.

℞. Massæ pillular. de quinque generibus

Myrobalanorum,

Pillular. aggregatar. ana ʒ ss.

Diagridij grana iv.

*Pillula.*

Cum aqua euphrasiæ formetur pillulæ quinque.  
 Pueris exhibeatur à ʒ j. usque ad ʒ ij. vel ʒ iij.  
 prout ætas & vires fuerint. Electuarij de succo  
 rosar. in tabellis, dissoluti in aqua betonicæ  
 vel euphrasiæ. Qui verò tabellis uti non pos-  
 sunt purgentur mannâ aut pulvere radicum  
 mechoacæ. Purgato corpore, utatur sequenti  
 Electuario.

℞. Conservæ flor. betonicæ,

Euphrasiæ &

Rosarum ana ʒ j. Misce.

*Electuarium.*

Si defluxus ex humoribus frigidis fuerit, digeratur primo sequenti potione.

℞. Aquar. betonicæ

Euphrasie

Fœniculi ana ℥ iij.

Mellis rosati colati,

Syrupi de Stœchade ana ℥ j. Misc.

Fiat lulapium pro duobus matutinis; postea purgetur sequenti potione.

Potio pur-  
gans.

℞. Electuarij Indi majoris ℥ iv.

Benedictæ laxativæ ℥ ij.

Cum decocto betonicæ, euphrasie, passularum & seminis anisi, fiat potiuncula. Aut dentur sequentes pillulæ.

℞. pillular. cochiar.

Lucis major. ana ℥ β.

Pillulæ.

Diagridij grana vj. cum syrupo de

Stœchade formentur pillulæ quinq;.

Pueris detur drachma una aut altera Electuarij diacarthami in tabellis, aut diaphenici cum rhabarbaro, prout ætas fert. Purgato corpore, utatur sequenti Electuario, pro corroboratione cerebri, & exiccatione humorum.

℞. Conservæ florum betonicæ &

Euphrasie ana ℥ ij.

Salviæ &

Rosmarini ana ℥ j. Misc.

Electuarij.

Hujus Electuarij sumat æger jejuno stomacho magnitudine castanæ. Decoctum Guajaci, radicum Chinæ, Salsæ parillæ, sassaphras summopere conveniunt: exiccando enim humores noxios, visum quoque corroborant.

Stoma-



Stomacho quoq; propter ipsius cū cerebro cōsensum, prospiciendū est. Debilis enim stomachus ad cerebrum multos mittit vapores, qui postea ad oculos descendunt. Abstineat igitur æger ab omnibus iis, quibus stomachus gravatur, & quæ difficilis sunt digestionis, sumat quoq; semel aut bis in hebdomade ʒj. hujus massæ.

℞. Pillular. hieræ picræ simplicis Galeni

*Massa pillular.*

Massæ pillular. Assaieret

Rhabarb. opt. triti

Pulveris senæ ana ʒj.

Garyophyllor.

Macis

Cinamomi ana ʒβ. cum syrupo rosato solutivo fiat massa pillular.

Utatur quoque æger semper post pastum aliquo medicamento quod stomachum corroboret, & elevationem vaporum impediat, qualia sunt miva cydoniorum simplex, conserva rosar. coriandrum præparatum, & sem. anisi & fœniculi, aut sequens pulvis.

℞. Seminis coriandri præparati

*Pulvis*

Sem. anisi ana ʒj.

Flor. betonicæ

Rosar. rubr.

Euphrasiæ ana ʒβ.

Cinamomi electi

Macis ana ʒij.

Pellicular. interior. ventriculi Gallinarum ʒβ.

Sacchari rosati ad pondus omnium.

D

Misce. Fiat pulvis.

*Tertia intentio.*  
Sequitur tertia intentio, quæ in Topicis & Chirurgicis consistit. Itaque si dolor magnus, & Inflammatio adfit, applicetur fronti defensivum aliquod, ex cap. 7. Oculis verò instilletur sequens Collyrium, & linteis reduplicatis in eo intinctis, applicetur.

*Collyrium.*

℞. Aquar. plantaginis  
Rosarum  
Euphrasæ ana ʒj.  
Cerusæ lotæ  
Tutiæ præparatæ  
Olibani subtilissimè pulverisati ana ʒj.

Misce. Si verò defluxus oculorum ex frigidis humoribus fuerit, applicetur sequens Collyrium.

*Aliud Collyrium.*

℞. Aquar. euphrasæ  
Fœniculi  
Rutæ ana ʒij.  
Olibani  
Masticis  
Myrrhæ  
Aloës  
Tutiæ præparatæ  
Sarcocollæ ana ʒj. Fiat Collyrium secundum artem.

*Sectio jugularium venarum in morbis oculorum utilissima.*

Si defluxio ex sanguine & humoribus calidis fuerit, incidatur cæphalica in brachio, si ætas & vires concedant. Ego in defluxionibus oculor. sæpissimè magno cum fructu venas iugulares externas incidi, verùm sectio harum venarum requirit Chirurgum expertum;

tum; est enim periculosa. Pueris loco phlebotomiæ hirudines applico, aut ad venam cæphalicam in brachio, aut in collo ad venas iugulares. Cucurbitulæ item magnæ cum flamma magna applicentur scapulis cum scarificatione.

Applicetur item sequēs vesicatorium post aures.

℞. Cantharidum in pulver. redactarū nu. 6. *Vesicatoriū.*

Fermenti acris ʒ. β.

Misce cum guttula una aut altera aceti.

Cortex interior fruticis vitis nigræ contusa & applicata eandem vim habet.

Utatur quoq; æger bis aut ter in hebdomada ieiuno stomacho, sequenti masticatorio.

℞. Masticis

Radic. pyretri

Summitat. maioranæ

Nucis muscatæ ana ʒ. j. Fiât in mortario cum melle trôchisci magnitudine lupini.

Mastiche item per se masticata, & diu in ore retenta, multas ex capite trahit humiditates. Passulæ item, aut pruna damascena, oleo fœniculi inuncta, & masticata, non tantùm ex capite trahunt humores, verùm etiam cerebrum & visum corroborant.

Sternutatoria in morbis oculorum non probo: humores enim ad nasum trahendo, nervos opticos simul adimplent, & visum debilitant, quemadmodum in observatione 24. declaravi. Sequens quoque pulvis capiti inspergendus est, ex quo etiâ cucufa parari potest.

*Masticato-  
rium.*

*Sternutato-  
ria in mor-  
bis oculorū  
periculosa.*

## R. Flor. rorisinarini

*Pulvis.*

Salviæ

Betonicæ

Stœchados

Rosar. rubr.

Summitatum maioranæ ana M.ß.

Coriandri præparati ʒj.

Ligni aloës

Masticis

Thuris

Diamoschi dulcis

Nucis moscatæ

Granor. Alkermes ana ʒß.

Incidantur &amp; contundantur omnia s.a.

Si visus ex continua, &amp; longa defluxione debilis factus sit, corroboretur aquâ sequenti destillatâ.

℞. Euphrasæ cum toto

Anagallidis flore purpureo,

Herbar. fœniculi ana M.xij.


Rutæ M. vj. Incidantur.

*Aqua visum corroborans.*

Posteâ superinfunde aq. rosac. ℥ ij. digerantur in sole, in vase vitreo, &amp; bene clauso, per diem, posteâ lento igne destillentur in balneo Mariæ, serveturq; aqua ad usum, est enim præstantissima ad corroborandos oculos.

*Setaceum.* Si defluxio & lachrymatio oculorum his non sedetur, & æger de visu periclitetur, applicandum est Setaceû ad tertiam aut quartam vertebra[m] colli, nõ tamen ferro candente, sed acu argenteâ, quemadmodum observatione 40, fusiùs declaravimus. Adultis Setaceilo-

cei loco causticum ad secundam vertebram potest applicari, ut inde fiat fontanella. Pueris tamen perniciofa est fontanella in vertice, ut in observatione 42, demonstravimus: Fontanellæ item in brachio sinistro, & crure dextro, non exiguam vim habent in defluxionibus oculorum, ut experientia indies docet.



*De Cicatricum Turpitudine earundemq; ablatione.*

CAPUT XIV.

**P**Ræcipuæ causæ turpitudinis cicatricum post combustionum curationes sunt, primò, quòd cutis, caro, venæ, &c. vi ignis contrahuntur, & indurantur; secundò, quòd humidum radicale (cuius beneficio vulnera, & ulcera omnia, cicatrizantur) vi ignis exiccatum, consumptumque est, inde fit, ut quemadmodum ficcus & aridus ager spinas tortuosas, zizania, & omnia imperfecta, ager verò pinguis & humidus, omnia perfecta producit: Ita etiam ex caloris innati, & humidi radicalis defectu cicatrices fiunt turpissimæ. Usus quoque medicamentorum frigidorum turpem gignit cicatricem, quemadmodum Hippocrates his verbis testatur: Ulceribus frigidum mordax, cutem obdurat, dolorem insupportabilem facit, denigrat, &c. Ut autem hoc incommodum evitemus ab initio usque

*Hippocr. lib  
5. aphor. 20.*

ad finem curationis emollientia sunt applicanda, quemadmodum antea monuimus. Quantum ad curationem, imprimis durities cicatricum emollienda, & lubrica facienda est, pinguedine urfi, gallinarum, caponum, oleo liliorum, & de vitellis ovorum, aut sequenti unguento.

*Unguentū.*

℞. Pinguedinis gallinæ,

Urfi,

Piscis thymali

Liliorum

De vitellis ovorum ana ʒ ij.

Ol. inyrrhæ ʒ j.

Succi lumbricor. ʒ β. Misce, fiat unguentum, quo singulis diebus bis aut ter cicatrix, & circumjacentes partes sunt inungendæ.

Postea applicanda est lamina plumbea spissa, inuncta Mercurio. Sed antequam inungatur pars affecta superiori unguento, ablunda est aqua, in qua furfures, & non nihil myrrhæ incoxerint. Si vero cicatrices adeo duræ & elevatæ fuerint, ut majorem emollitionem requirant, fovitur locus prius sequenti decocto.

*Decoctum.*

℞. Radicum althææ cum toto

Radicum bryoniæ, &

Lilior. alborum ana. ʒ j.

Flor. chamomillæ

Meliloti ana M. j.

Sem. fœnogræci

Liniana ʒ β.

Coquan.

Coquantur in aqua aut decocto pedum & capitis vervecis, appliceturq; cum spongijs aut filtris, in eo intinctis. Post fotum inungatur superiori unguento, appliceturque ceratum Oesyppi, Philagrij, aut emplastrum de Ranis cum Mercurio, idque tantisper faciendum, & singulis diebus bis reiterandum, donec Cicatrix satis sit emollita, ut possit à lamina plumbea deprimi.


Quotiescunq; autem Chirurgus cicatrices inunxerit, ambabus manibus cutem induratum contractamq; extendere tentabit, quemadmodum pelliones solent extendere pelles.

Si verò cicatrix adeò elevata, contracta, & indurata fuerit, ut inde maxima turpitudine & deformitas faciei sequatur, excidenda est (si æger consentiat, & pars affecta admittat) lineâ in rectum, quâ tum fieri poterit, diductâ. Postea vulnus, quod antea contractum fuit, dilatandum erit, id autem fiet medianti-

bus linteaminibus, illinitis glutine,

ut sequens figura

indicat.



**A** Cicatricis excisæ vulnus est.

**B. B. B. B.** Quatuor sunt lintea oblinita glutino, quorum ad utrumque latus vulneris duo erunt ponenda, ita tamè, ut spacium aliquod inter utrumque remaneat, ut ex figura apparet.

**C. C. C. C. C. C.** Fibulæ sunt sex plus aut minus secundùm magnitudinem vulneris. Porò quam primùm gluten siccatum fuerit, ita ut lintea cuti firmiter adhereant, quod spacio quatuor aut quinque horarum fit, aut ad summum diei dimidiæ, constringendæ sunt fibulæ: sic enim contrahitur & constringitur cutis, quæ est inter lintea, vulnus autem dilatatur. Interim carnatio & cicatrizatio vulneris, quantum fieri potest acceleranda est, nec amovenda



venda lintea, donec vulnus sit curatum. Glu-  
rinum conficitur ex adstringentibus viscosis  
& emplasticis medicamentis, ut

R̄. Farinæ volatil̄is ℥j.

Masticis

*Glutinum.*

Rosar. rub.

Sanguinis drac. ana ʒ ij. Fiat omnium  
pulvis subtilissimus, qui albuminibus o-  
vorum & mucilagine gummi tragacan-  
thi, ad mellis consistentiam, miscendus.

Illud tamen notandum, applicationem hu-  
jus glutinis non nisi post factam digestionem  
vulneris, fieri debere. Dum enim fit digestio,  
dolores adsunt, & labia vulneris inflantur, id-  
eoque glutinō dolor non est augendus, factā  
digestione aliquando vulnus abluendum est  
aquā vitæ; facit enim pulchras cicatrices: loco  
quoque emplastri potest applicari lamina plum-  
bea, inuncta mercurio. Curato vulnere, appli-  
canda sunt, quæ faciem dealbescunt, qualia  
sunt aqua liliorum alborum, aqua florum fa-  
barum, sudor item ovorum, aut aqua destilla-  
ta ex testis ovorum, illa enim pretiosissima est  
ad cicatrices dealbandas.

*Nota.*

---

*De retractis nervis & incurvatis jun-  
cturis post combustiones.*

CAPUT XV.

**I**N maximis combustionibus ad articulos,  
solent nonnunquam nervi retrahi, & jūcturæ  
incurvari, idque præcipue si Chirurgus circa

initia non satis diligens fuerit, nec ferulas, aliaque instrumenta, de quibus monuimus capite II. adhibuerit. Est igitur nova instituenta curatio. Sed prius purgandum est corpus secundum humoris predominantis naturam. Inprimis autem conveniunt pillulæ de hermodactilis, & pillulæ aggregativæ; item Electuarium Indum majus, & benedicta laxativa. Si plethora adest, incidatur vena, extrahaturque sanguis secundum virium magnitudinem, de quibus omnibus consulendus est medicus.

Purgato jam & preparato corpore, uti modo diximus, pars affecta sequenti decocto emollienda lubricaque; facienda est.

℞. Radicum althææ cum toto

Radic. bryoniæ

Liliorum albor.

Malvarum ana ꝑ ij.

Fol. violarum

Flor. chamomillæ

Melioti

Hyperici

Chamæpythidis

Chamædrios ana M. j.

Sem. fœnogræci

Lini ana ꝑ j.

Coquantur in juscule pedum & capitis vervecis aut vituli pro fotu. Postea inungatur totum membrum sequenti unguento.

℞. Unguenti dialthææ ꝑ ij.

Axungia humanæ,

*Decoctio emolliens.*

*Unguentum.*

Galli-

Gallarum


Anseris

Ursiana ꝑ̄ β.

Succilumbricorum ꝑ̄ j.

Aquæ vitę ꝑ̄ β. Misce, fiat unguentum.

Posteà applicetur emplastrum ex mucilagini-  
bus, vel Emplastrum Oesyppi, Philagrij, aut  
de meliloto, extensum supra alutá. Nervis his  
& ligamentis juncturæ satis emollitis, ad ex-  
tensionem transeundum est, ea autem com-  
modè sine dolore & periculo fieri potest, in-  
strumentis ad hoc negotium accommodatis.  
Si vitium est in genu aut cubito, aptissima  
sunt hæc instrumenta quæ & à Gual-  
thero *Kenff* in sua Chirurgia de-  
pinguntur.



Aut utere sequenti instrumento ex nostra  
 inventione, quod quivis parvo cum negotio,  
 & sumptu habere & tam ad genua, quàm cu-  
 bitos incurvatos adaptare potest.



A.A. Capsulam ex ligno fabricatam, tam in prima, quam secunda figura denotat.

B. B. Annulus est ex lamina ferrea ejus latitudinis, ut genu totum possit amplecti, fabricatus. Is autem in prima figura appertus, in altera verò clausus, & genu amplectens, cōspicitur. Vt autem eò melius adaptari possit, pars illa, quę rotulam respicit, aliquantum excavata sit, necesse est.

C.C. Torcular existit, beneficio cujus annulus capsulam versus trahitur, aut quantum opus est, in altum elevatur.

D.D.D. Tam in primæ quam secundæ figuræ parte una claviculum, altera verò foramina denotat, quorum beneficio annulus tantum, quantum necesse est, constringitur, vel laxatur.

E. In prima figura cardines, quibus annulus clauditur apperiturque, denotat. Apperto itaque annulo, collocataque tibiâ in capsulam annulus circumcircà genu aptandus est, stupisque undiquaque & linteis muniendus: postea clavo & foraminibus D.D.D. notatis, claudendus. Habet prætereà fibulas duas, F.F.F.F. denotatas, & lora duo G.G.G.G. signata, quorum beneficio tibia capsulâ alligatur. Circum ducto prætereà torculari C. C. notato, à dextra in sinistram, annulus, simulque genu capsulam versus trahitur, extenditurque tibia tantum, quantum Chirurgo opus esse videbitur. Porrò torcular, ut liberè in annulo circumvolvatur necesse est: ideoque ex interiori sua  
parte

parte nodum H. notatum habeat.

I. Lamina est ferrea, quæ capsulæ median-  
tibus duabus claviculis, firmiter annexa est, ut  
in ea torcular commodè circumvolvatur.

Si verò combustio in digitis fuerit, inge-  
niosi & industrij Chirurghi erit, instrumenta  
ad id apta & commoda, prout affectus requi-  
rit, excogitare. Ego sequentibus medicamen-  
tis & instrumētis, digitos omnes manus dex-  
træ, excepto pollice, ex combustionione in ex-  
ternam manus partem retractos, ibique con-  
glutinatos, restitui. Quæ curatio, etsi iam an-  
teà in Observationibus nostris proposita sit,  
attamē ne quid hoc loco desideraretur, quod  
ad hanc materiam spectare posset, denuò il-  
lam hîc annectere placuit, tu lector omnia  
benevolè consule.

Anno 1596. Isaacus Gotteran de Perroy,  
adduxit ad me Lausannam filium suum Mi-  
chaëlem, 14. menses natum. Is autem sexto  
mense ætatis, manu dextra in prunas cecide-  
rat: Hinc index, medius, annularis, & auri-  
cularis unâ cum externa metacarpi parte, ad-  
eò combusti fuerunt, ut apices horum digi-  
torum usque ad primam articulationem de-  
ciderint. At quia pater curationem imperitis  
commiserat, digiti omnes (excepto pollice.)  
cum cute metacarpi quasi in globum (ut se-  
quens figura ostendit) conglutinati fue-  
rant.



Septimo mense post absolutam curationem, adducunt ad me puerum parentes Laufannam, auxiliumque meum implorant. Purgato itaque corpore, mannâ ex juscule exhibitâ, topica & chirurgica sic institui. Primò sequenti decocto emollienti & unguento, per dies aliquot usus sum.

By. Radi



℞. Radicum althææ cum toto  
 Radic. bryoniæ  
 Liliorum albor. ana ꝑj.  
 Florum chamomil.  
 Meliloti  
 Chamædr. ana M. j.  
 Sem. fœnogræci  
 Lini ana ꝑj.

Coquantur in iusculeo pedum & capris ver-  
 cecis aut vituli pro fotu. Postea inunxi totam  
 manum & brachium sequenti unguento.

℞. Unguenti dialthææ ꝑj.  
 Axungia humanæ  
 Gallinarum  
 Anseris  
 Ursi  
 Succilumbricorum ʒß.

Misce, fiat unguentum.

Tandem manum involvi emplastro de mucilaginibus. His nervi & callositas ex corrugata cute metacarpi, & digitorum in externa parte manus concretâ, satis emollita: inde callum illum inter digitos & metacarpum novacula excidi, digitos item separavi. Deinde inspersi pulverem meum ad sanguinem sistendum, & albumina ovorum mixta cum aqua rosac. & plantaginis, oleoque rosac. applicui. Defensivum quoque ad carpum adhibui, & totum brachium oleo rosaceo, myrtillorum & lumbricorum inunxi. Postero die sequens digestivum filamentis suavibus supra incisiones

66 GVIL. FABRICII HILD:  
posui, & brachium, ut antea suprà dictis oleis  
inunxi.

R̄. Therebinth. lotæ in aq. rosac. &  
plantag. ℥ j.  
Olei rosac. & de  
Vitellis ovorum ana ℥ ij.  
Croci ꝑ β,  
Vitellum unius ovi. Misce.

Quinto die apposui sequens instrumentum  
ex ligno fabricatum, & inœpi paulatim digi-  
tos ad naturalem situm attrahere.

A. Ferula



A. Ferula est lata tribus digitis in latitudine positus, ejus longitudinis, ut à carpo ad cubitum ferè usque pertingat.

B. Baculus est rotundus, pollicis crassitie, qui ferulæ firmiter affixus est: è medio autem hujus baculi exurgūt clavi quatuor rotundi, & ex ligno fabricati C. C. C. C. notati. Habet item ferula fibulas duas D. D. notatas, & lora duo E. E. signata, quorum beneficio instrumentum brachio alligatur: ut ex figura satis apparet.

Alligato itaque instrumento, & undique linteis, stupis aut gossipio bene munito; habui in promptu digitalia ex pelle fabricata, quæ extremitatibus digitorum apposui. Deinde filo, quod eis appendet, digitos deorsum attraxi, & clavis C. C. C. C. notatis, alligavi, atque singulis diebus magis magisq; incurvavi. Id autem ut eò melius fieret, brachium & manum superiori unguento, quotiescunq; vulnera tractabam, inunxi. Ne autem digiti denuò conglutinentur, laminas plumbeas digitis interponebam. His paulatim digiti ad naturalem situm redacti fuerunt. Interim vulnera quoque consolidavi & cicatrizavi, non quidem iis, quæ valdè exiccant, sed iis, quæ simul emolliendi vim habent, medicamentis: quemadmodum in tractatu nostro de Combustionibus ostendemus. Atque sic divino favore, manus in integrum restituta fuit.

*De Fulmine, & quomodo eis qui ab  
eo læsi, sit succur-  
rendum.*

CAPUT XVI.

**Q**uia ignis cęlestis omnium vehemen-  
tissimus & periculosissimus, ac in se  
contineat quasdam facultates super-  
naturales, quibus homo protinus extingui-  
tur, cunctandum non est, quid faciendum sit.  
Hanc ob causam, in gratiam tyronũ, Chirur-  
gorũ castra sequẽtium, breviter declarare pla-  
cuit, quomodo eis qui à fulmine læsi, occur-  
rendum sit: omnibus tamen Chirurgis ad hu-  
jusmodi ægrotos accersitis, suadeo ut ope-  
ram dent, quò possint sibi adiunctum habere  
Medicum.

Quamvis autem ignis ille cęlestis, ut expe-  
rientia docet, in se facultates quasdam super-  
naturales, & hominis ingenio planè abditas,  
contineat, id tamen perspicuum est, ignem il-  
lum adjunctam habere qualitatem, & mate-  
riam mirum in modum malignam atque ve-  
nenosam, idque satis denotat teter ille & pe-  
stiferus odor, qui tum ex hominibus, tũ ani-  
malibus, arboribusque; à fulmine ictis erumpit.  
Hinc fit ut ursi, vulpes, cuniculi aliãque; anima-  
lia iis in locis fulmine ictis, degentia (ut viri  
nonnulli docti testantur) propter hujus odo-

ris sævitiam, in eorum speluncis morari non possint. Canes item de carne animalium à fulmine interfectorum non gustant. Ex his perspicuum fit, quàm periculosum sit, uti herbis iis in locis collectis: conspicitur enim quandoque, ut Olaus Magnus Hist. Septentrionalium lib. 1. cap. 12. testatur, terra quasi sulphure conspersa. Mirum igitur nemini videri debet, aliquando homines subitò, & sine manifesta causa mori.

Est autem ignis ille, quemadmodum Seneca testatur, triplex. Primùm enim subtilissimus est, hinc fit ut inanimata veluti arbores & similia illæsa pervolet. Secundò præter subtilitatem illam, materiam quandam continet siccissimam, & magis terrestrem: hinc fit, ut partes corporis molles, illæsas penetret, duriora verò, quemadmodum ossa, rumpat, id verò non solum in animatis, verùm etiam in inanimatis accidere observavi. Superiori anno 1604. cùm ligna pro usu culinæ advehenda curassem, occurrit ingens quercus, quæ ante annos aliquot à fulmine iccta fuerat, quod quidem ex fissura, quæ in exteriori parte corticis à summitate ad radicem usque conspicietur, manifestum erat. Extrinsecus tamen pulchra & virescens erat quercus illa. Fisso trunco inventa est medulla, quæ in querceis arboribus durissima, à summitate usq; ad radicem planè cariosa. Tertiò materiam habet adhuc magis terrestre & crassam, quam obrem non usq; adeò penetrat, uti de aliis diximus, sed

sed incendit ea, quæ primùm obvia veniunt, quemadmodum videmus civitates, templa, aliaque ædificia à fulmine incendi, & in cineres redigi.

Id autem fit partim propter ignis vehementiam, partim quoque, quòd homines ut plurimum ad defensionem & extinctionem ignis negligentes sint, ac tardi. Communis enim opinio est, ædificia fulgure incensa, non posse aquâ restingui. Mihi verò contrarium videre contigit. Anno enim 1592. Hildenæ in patria, turrim templi, altam satis & lapidibus tectam, fulminis ictu adeò incensam vidi, ut ex una parte flagrare cœperit, trabesq; nonnullæ ingentes ab ictu illo fissæ fuerint, quod tãdem incendium postmodũ aquâ restinctũ fuerat. Sic etiam inurit hæc species ignis corpus humanum, ac post se relinquit vestigia satis manifesta, quemadmodum pustulas, maculas nigras, & fractiones ossium. Subtilis autem & abdita illa penetrabilis qualitas prioris ignis, venenum illicò secum ducit ad cor & cerebrum, moriturq; animal ipso momento. Secunda quoque hujus ignis species, quia subtilis est, statim officit partibus nobilibus, sed quia conjunctam secum habet materiam magis terrestrem, quemadmodũ dixi, ossa etiam & vasa abrumpit, atque protinus extinguit animal, aut ipso momento, aut paulò post. Tertia verò species, quia (ut dixi) ipsius materia terrestris est, & crassa, minùs erit periculosa.

Ex his facile apparet, qualis nam methodus curandi sit instituenda. Illa enim in hoc consistit, ut cor partesq; nobiles corroborentur & à vaporibus malignis & venenosis defendantur. Ideo que illicò exuendæ & abjiciendæ sunt vestes, non solùm, ut inspirationi & expirationi pulmonis consulatur, verùm etiam ne malignus ille vapor fulminis, qui vestibus inhæret, partes nobiles, planè suffocet. Exutis vestibus, & ægro decubito inter lintheamina suffumigata baccis Juniperinis, radicibus angelicæ, foliis lauri & rutæ, exhibenda illi sunt lapidis Bezoardici in subtilissimum pulverem redacti grana 6. aut 8. cum aqua buglossæ, cardui benedicti aut melissæ dissoluta, provocandusq; est sudor, quò natura venenum ad exteriora propellere possit. Si lapis ille in promptu non fuerit, exhibenda est theriaca ad ʒ j. plus aut minùs, prout ætas fuerit. Labia, lingua, nares, tempora, frons & arteriæ ad carpum inungendæ sunt vino malvatico, in quo theriaca sit dissoluta. Cordi applicetur sequens Epithema.

R̄. Aquarum buglossæ &

Melissæ ana ʒ ij.

Vini malvatici ʒ j. β.

Aquæ cinamomi ʒ j.

Electuar. de gemmis ʒ j.

Confect. Alkermes ʒ β.

Croci ʒ j. Mixtis omnibus cordi tepidè applicetur.

Brachia & crura fortiter sunt liganda, lintheisq;



DE COMBUSTIONIB. LIBEL. 73

teisq; asperis & calidis fricanda, ut venenum ad exteriora attrahatur. Si pustulæ, vulnera, aut maculæ adsint, applicentur protinus cæpæ cum sale, folijs rutæ & theriaca, quassatæ, applicenturq; cucurbitulæ, hirudines, incisus prius vesicis. Putrefacientia & Escharam relaxantia hic locum non habent. Excidatur igitur Eschara scalpello, & forficibus, postea ulcera sequenti ungueto sunt mundificanda.

℞. Mellis rosacei ℥ ij.

*Unguentum.*

Pulveris radic. vincetonicæ &

Angelicæ ana ℥ β.

Fol. rutæ cum pulveribus quassator. p. ij.

Theriacæ ℥ ij.

Aquæ vitæ ℥ β. Misce,

Fiat Mundificativum. Mundificatis ulceribus, inspergendus est sequens pulvis sarcoticus.

℞. Pulveris radicum Vincetoxici &

*Pulvis sarcoticus.*

Angelicæ ana ℥ j.

Myrrhæ

Masticis

Olibani

Fol. Scordijana ℥ iv.

Fiat omnium tenuissimus pulvis, ex quo cum sufficiente quantitate succi Nicotianæ, Santiculæ vel pyrulæ fiant trochisci, qui in umbra exiccet, iterumq; in pulverem redigantur. Is pulvis pretiosissimus est, & in hujusmodi, alijsq; ulceribus putridis & venenosis, veluti in Anthrace, Gangræna, & Cancro: mundificat enim, & putredini adversatur: admixto parum aluminis usti, cicatricem quoque in-

ducit. Si qua ossa fracta fuerint, reponenda sunt, sed prospiciat Chirurgus, ne Emplastica astringentia & refrigerantia, ut in fracturis fieri solet, applicet, his etenim expiratio & evaporation veneni impeditur, applicetur itaque sequens cataplasma.

*Cataplasma.*

℞. Farinæ fabar.

• Lupinor. ana ꝑ j β.

Pulv. radicum vincetoxici &

Angelicæ ana ꝑ β.

Folior. Rutæ M. β.

Coquantur cum oxymellite ad formam cataplasmatismatis. Postea admisceatur theriacæ, aut Mithridatij ꝑ j. Fractura singulis diebus semel deliganda, & cataplasma renovandum est, membro prius vino, in quo radices vincetoxici & angelicæ coxerint, & theriaca parumq; aceti rosacei dissoluta fuerit, abluto. Idq; tantisper, dum metus veneni adest, faciendum. Defensivum ad latitudinem palmi minoris supra fracturam applicetur, ut elevatio veneni ad partes nobiles impediatur.

Interim autem dum externa, uti dixi, adhibentur, Cor, partesque nobiles roborandæ sunt, non tantum superscripto Epithemate, verum etiam conservis & Electuarijs, veluti conservâ florum buglossæ, calendulæ, rosmarini, melissæ, corticum citronum. Diamargarito frigido, Lætificante Galeni, Confectione Alkermes, aquâ Cinamomi & similibus.

*Diætina ra  
tio.*

Utatur jusculis carniū recētium, in quibus borrago, buglossum, calendula, acetosa, ros. marinus,

marinus, maiorana, macis, crocus, cinamo-  
mun, & similia coquant. Ad omnibus, quæ  
difficili sunt digestionis, obfines. Prospi-  
ciendū est, quæque in alius tempera, in pri-  
ca, diuina, & cetera. In  
rijs, in Luchman, in  
& vena sectione, in inendum

F. N. I. S.



~~Handwritten text, heavily obscured by ink blotches.~~

~~Handwritten text, heavily obscured by ink blotches.~~

Ratio venen  
as catapla  
farinæ fal  
ubior

~~Handwritten text, heavily obscured by ink blotches.~~

~~Handwritten text, heavily obscured by ink blotches.~~


~~Handwritten text, heavily obscured by ink blotches.~~



~~Very faint, illegible text at the top of the page.~~

~~Large block of illegible text, possibly a list or index, with several lines of text obscured by heavy black redaction marks.~~

~~Very faint, illegible text at the bottom of the page.~~



*us her damnatus.*  
 Guil. Fabric. Hildanus cum  
 mærore & lachrymis  
 L. M. Q. P.

*hoc in libro comprehen-*  
*sum.*

- Cap. I. Definitio & gradus combustionum, f. 1.  
 II. Gradus & distributio combustionum  
 in tres species, & quibus  
 curatioes curativæ petendæ,  
 III. Gradus & distributio gradus combu-  
 stionum, & distingue  
 IV. Prognosis combustionum,  
 V. De duplici methodo combustionum  
 curandarum,  
 VI. Curatio primi gradus Combusti-  
 onum,  
 VII. Curatio secundi gradus Combusti-  
 onum,  
 VIII. Curatio tertii gradus Co-  
 mbustionum,  
 IX. De Combustionibus ad oculos,  
 X. De Combustionibus in guttibus,  
 XI. De Combustionibus in membranis,  
 XII. De Dolore ejusq; curatione  
 XIII. De imbecillitate visus,  
 XIV. De Curatio in profunditate earunden-  
 que ablatione, 53.  
 XV. De retractis nervis & incurvatis jun-  
 cturis post combustiones, 57.  
 XVI. De Fulmine, & quomodo eis qui ab eo  
 læsi, sit succurrendum, 69.

*Ursinus Noster Caput*

en quinquagenarios libratione  
del Rey y de ferallion de puz  
Quinto de la que se del arte de puz  
Hoy en el cast. de la riana en el mes  
de Mayo de Mill y quinientos y  
Oynte y seis años

en el D<sup>o</sup> Don Antonio


Marin de Bacan


Por mandado del Rey  
Yo el Rey


*[Faint, mostly illegible handwritten text in a cursive script, possibly a letter or manuscript page.]*














88/194

UNIVERSIDAD DE SEVILLA



600720188

228803917

